



2022-5

6. december 2022

All. nr./notatnr.:

2022-324-0001-28

Sull./sagsbeh.: MS/jh

**Kommunip sulianik suliarinnittumik peersitsinerani suliami illua'tungiusup isumaanik tusarniaaneq amigaatilik amigartumillu tunngavilersuineq**

*Meeqqanik Ilaqutariinnillu ingerlatsivimmi sulianik suliarinnittup e-mailikkut allakkanik kinguaassiuutinut tunngasunik imalinnik inuusuttumut angerlarsimaffiup avataanut inissiinerup kingornatigut malitseqartitsivimmi najugaqartumut nassiussisarsimanagera Kommuneqarfik Sermersuup (matuma kingornatigut kommunimik taaneqartartussap) 30. august 2021-mi paasivaa.*

*Kommunip suliami illua'tungiusup isumaanik tusarniaalluni allakkat sulianik suliarinnittumut 31. august 2021-mi nassiuppai, oqaatigalugulu kommunip pineqartoq kommunimi atorfianit peersissamaaraa.*

*Kommunip sulianik suliarinnittoq 9. september 2021-mi peersippaa.*

*Kommunip peersitsisoqarnissaanik aalajangiinera sulianik suliarinnittup Ombudsmandimut 12. januar 2022-mi naammagittaalliuutigaa.*

*Ombudsmandip suliamik misissuineq tamanna tunngavigalugu aallartippaa.*

*Ombudsmandi isumaqarpoq kommunip suliami illua'tungiusup isumaanik tusarniaalluni allagai 31. august 2021-meersut suliassat suliarineqartarnerat pilugulu inatsimmi § 19-imi aamma annertusisamik tusarniaasussaataanermi inatsisikkut aalajangersagaanngitsumi suliami illua'tungiusup isumaanik tusarniaanermut piumasaqaatinik eqqortitsisuunngitsut, pisummi peersitsissamaar-*

*nermut aalajangiisuusut kommunip naammattumik erseqqissarsimangimmit. Ombudsmandip tamanna tunngavigalugu naliliinera unaavoq suliami illua'tungiusup isumaanik tusarniaaneq amigaateqartoq. Ombudsmandi isumaqarpoq kommunip suliami illua'tungiusup isumaanik tusarniaanera ajuusaarnartuusoq.*

*Ombudsmandi aammattaaq isumaqarpoq kommunip peersitsisoqarnissaanik aalajangiinera 9. september 2021-meersoq amigartumik tunngavilersugaasoq, aalajangiinermi suliassat suliarineqartarnerat pillugu inatsimmi suliami illua'tungiusup isumaanik tusarniaasussaataitanermi annertusisami piumasaqaataasunik eqqortitsisuunngimmat. Ombudsmandi tamanna tunngavigalugu isumaqarpoq kommunip aalajangiinermut tunngavilersuutaa ajuusaarnarlunnartuusoq.*

*Ombudsmandili naliliivoq suliami illua'tungiusup isumaanik tusarniaanerup amigaateqarnera atuussinnaassuseqannginnermik nassataqanngitsoq, suliamimi illua'tungiusup isumaanik tusarniaanerup amigaateqarnera sulianik suliarinnittup pisunik paasisaqarsinnaaneranut aalajangiinermilu tunngavigineqartumut sunniuteqarsinnaaneranut aalajangiisuusumik pingaaruteqanngimmat.*

*Ombudsmandip suliaq tamanna tunngavialugu naammassillugu suliaaraa, suliamilu annertunerusumik iliuuseqaqqinnani.*

*(Oqaaseqaat 6. december 2022-meersoq, j.nr. 2022-324-0001)*

## **Tamatuma kingornatigut imattut oqaaseqaateqarpunga:**

### **1. Suut misissorpakka?**

**1.1.** Kommunip suliassat suliarineqartarnerat pillugu inatsimmi malittarisassat suliami illua'tungiusup isumaanik tusarniaanissamat annertusisamik pisussaaffik inatsisikkut aalajangersagaanngitsoq suliami illua'tungiusup isumaanik tusarniaanermut tamatumalu kingornatigut suliamik suliarinnittup (matuma kingornatigut A-mik taaneqartartussap) peersinneqarnissaanik aalajangiinermut atatillugu eqqortissimanerai suliamik suliarinninninni isummerfiginiarlugu aalajangerpunga.

A-p Meeqqanik Inuusuttunillu Ingerlatsivimmi sulianik suliarinnittutut atorfirmi- nit peersinneqarnera ingerlatsinermik inatsiseqartitsinermi pisunut naapertuut- tumik iliuuseqartussaannermik tunngavimmik unioqqutitsinerunersoq isummerfi- giniarnagu aalajangerpunga. Taamaalillunga manna isummerfiginngilara, tassalu A-p pissusilersornera atorfeqartitaanermit tunngasunik unioqqutitsinertut ima annertutiginersoq/kusanaatsiginersoq tamanna peersitsinermit tunngavilersuu- taasinnaalluni.

A kommunimi sulianik suliarinnittutut atorfeqartitaanerminut ilagitillugu meeppa- nik inuusuttunillu illersuisussatut atorfinitsinneqarsimaneramik apeqput aamma- taaq isummerfiginngilara.

Tamatamani Inatsisartut Ombudsmandiat pillugu Inatsisartut inatsisaanni nr. 7- imi, 1. juni 2017-imeersumi § 14, imm. 1 innersuussutigaara, tassuunalu aalaja- ngersarneqarpoq naammagittaalliuut misissuineramik aallartitsinermit pissutigis- sallugu naammannersoq Ombudsmandip aalajangissagaa.

**1.2.** Ajornartorsiutinik taamaattunik siusinnerusukkut nammineq suliarinnissi- manngikkaangama Danmarkimi atuakkiaasimasut aamma Folketingip Ombuds- mandiaata periaasia oqaaseqaatinni arlalitsigut aallaavigisarpakka. Kalaallit Nu- naanni inatsiseqartitsinikkut tunngaviup Danmarkimilu inatsiseqartitsinikkut tun- ngaviup pingaarnerusutigut assigiinnerat tamatumunnga pissutaavoq. Kalaallit Nunaanni inatsiseqartitsinikkut tunngavik Danmarkimi inatsiseqartitsinikkut tun- ngavimmit allaasoq isumaqaraangama tamanna oqaatigisarpara.

Oqaaseqaatiga imatut tulleriinnilerneqarpoq:

- Immikkoortoq 2: Suliaq pillugu naatsumik oqaatigisassat
- Immikkoortoq 3: Inatsiseqartitsinikkut tunngavigisaq
- Immikkoortoq 4: Kommunip isumaa
- Immikkoortoq 5: Uanga naliliinera
- Immikkoortoq 6: Eqikkaalluni inerniliineq

Oqaatigaara suliaq ingerlasimanerata allaaserineqarnera oqaaseqaammut tul- liummat.

## **2. Suliaq pillugu naatsumik oqaatigisassat**

A mailikkut allakkanik kinguaassiuutinut tunngasunik imalinnik inummut atiatigut taaneqanngitsumut Kommuneqarfik Sermersuumi Meeqqanik Ilaqutariinnillu Ingerlatsivimmit angerlarsimaffiup avataanut inissiinerup kingornatigut malitseqartitsivimmi inissinneqarsimasumut 19. maj 2021-mi, 4. juni 2021-mi, 6. juni 2021-mi aamma 26. juni 2021-mi nassiussisarsimavoq.

A Kommuneqarfik Sermersuup Meeqqanik Ilaqutariinnillu Ingerlatsiviani sulianik sularinnittutut 1. juli 2021-mi atorfinitsinneqarpoq.

A e-mailikkut allakkanik kinguaassiuutinut tunngasunik atisaqaranilu assiminik imalinnik inummut atiatigut taaneqanngitsumut tassunga 17. august 2021-mi nassiussisimavoq.

A-p e-mailikkut allakkanik kinguaassiuutinut tunngasunik imalinnik angerlarsimaffiup avataanut inissiinerup kingornatigut malitseqartitsivimmi najugaqartumut aataatsimut arlalinnulluunniit nassiussisimanera kommunip 30. august 2021-mi paasisimavaa.

Kommunip peersitsissamaarneq pillugu suliame illua'tungiusup isumaanik tusarniaanera A-p 31. august 2021-mi tiguaa. Suliami illua'tungiusup isumaanik tusarniaalluni allakkat tiguneqarnerat uppersarsarlugu A-p ulloq taanna atsiorsimavaa, suliame illua'tungiusup isumaanik tusarniaanermut akissuteqarnissaminut periarfissani atorsimanagu. Suliami illua'tungiusup isumaanik tusarniaanermut akissuteqarnissamut 6. september 2021 kingullertut piffissaliunneqarsimavoq.

Kommuni peersitsisoqarnissaanik 9. september 2021-mi aalajangiivoq.

A-p allagaatit arlallit uannut 12. januar 2022-mi nassiuppai.

A-p oqarasuaatikku 18. januar 2022-mi oqaloqatigineqarnermini sulisuma ilaannut oqaatigaa kommunimi Meeqqanik Ilaqutariinnillu Ingerlatsivimmi atorfimminit peersinneqarnissaminik kommunip aalajangiinera 9. september 2021-meer-

soq naammagittaalliuutiginiarini. A-p oqarasuaatikkuq oqaloqatigiinnermi tassani aamma oqaatigaa sulisut peqatigiiffiannut ilaasortaanani.

### **3. Inatsiseqartitsinikkut tunngavigisaq**

#### **3.1. Peersitsinermi suliami illua'tungiusup isumaanik tusarniaasarneq**

Pisortat ingerlatsineranni suliassat suliarineqartarnerat pillugu Inatsisartut inatsisaanni nr. 8-mi, 13. juni 1994-imeersumi kingusinnerusukkuq allannguuteqartinneqarsimasumi (matuma kingornatigut suliassat suliarineqartarnerat pillugu inatsimmik taaneqartartussami) § 19-ikkut aalajangersarneqarpoq oqartussasoq, suliami aalajangiinnginnermini, suliami illua'tungiusup isumaanik tusarniaa-nissamut nalinginnaasumik pisussaaffeqartoq. Suliami illua'tungiusup isumaanik tusarniaasussaataaneq inatsisikkut aalajangersagaasoq oqartussaasup nammineq sulisui eqqarsaatigalugit atorfinitsitsisarneq pillugu inatsiseqartitsineq tunngavigalugu iliuitsinut aalajangersimasunut aamma atuuppoq. Peersitsineq suliassat suliarineqartarnerat pillugu inatsimmi aalajangiinermik oqartarnertut aalajangiineruvoq, taamaattumillu suliami illua'tungiusup isumaanik tusarniaasarneq pillugu malittarisassat sulianut peersitsinernut tunngasunut aamma atuupput.

Suliami illua'tungiusup aalajangiissamaarnermut pissusiviusutigut tunngaviusunik ilisimasaqalernissaminut taakkulu pillugit oqaaseqaateqarnissaminut oqartussaasup aalajangiinnginnerani periarfissinneqarnissaata qulakkeerneqarnissaa suliami illua'tungiusup isumaanik tusarniaanerp siunertaraa. Taamaalilluni peersitsissamaarneq pillugu suliami illua'tungiusup isumaanik tusarniaanerp suliami illua'tungiusup isumaanik tusarniaavigineqartup iliuuserisimasami peersitsisoqarnissaanillu aalajangiissamaarnerup imminnut qanoq ataqatigiinneqarnerannik paasisaqarnissaminut periarfissinneqarnissaa siunertaraa. Suliami illua'tungiusup isumaanik tusarniaavigineqartoq paatsuisoqarsimappat paatsuinernik, eqqoqqissaanngitsunik amigaatilinnillu naqqiisuteqarnissaminut taamaalilluni periarfissaqalersarpoq.

Suliami illua'tungiusup isumaanik tusarniaavigineqartoq oqartussaasup suliamik paasinninnera pillugu tamakkiisumik aammattaaq paasisaqartarpoq sulisitsisumullu immiut illersornissaminut periarfissaqalersarluni. Oqartussaasup suliamik

paasissutissartalersuina suliama illua'tungiusup isumaanik tusarniaaneraup tapertalertarpa, oqartussaasullu eqqortumik paasissutissartalersugaasumillu tunngaveqarluni aalajangiinissaa qulakkeertarlugu. Taamaalillutik suliama illua'tungiusup isumaanik tusarniaasarneq pillugu malittarisassat ingerlatsiviup innuttaasunit tatigineqarnerata annertusarneqarneranik qulakkeereqataapput.

Suliama illua'tungiusup isumaanik tusarniaasussaataaneq suliassat suliarineqartarnerat pillugu inatsimmi § 19, imm. 1 tunngavigalugu atuuttarpoq oqartussaasoq suliama pissusiviusut pillugit paasissutissanik aalajangersimasunik pigisaqarpat, paasissutissat taakku suliama illua'tungiusumut akornusiisuuppata – oqartussaasullu paasissutissanik pineqartunik pigisaqarnera suliama illua'tungiusup ilisimassagaa ilimagineqarsinnaangippat.

Atorfinitsitsisarneq pillugu inatsiseqartitsinermi iliuitsinut aalajangersimasunut, matumani peersitsisoqarnissaanik aalajangiineq ilanngullugu eqqarsaatigalugu, atatillugu suliassat suliarineqartarnerat pillugu inatsimmi § 19-imi suliama illua'tungiusup isumaanik tusarniaasarneq pillugu malittarisassaq nalinginnaasoq suliama illua'tungiusup isumaanik tusarniaanissamut annertusisamik pissusaaffik pillugu malittarisassamik inatsisikkut aalajangersagaangitsumik tapertalernerqartarpoq.

Tamatuma nassataraa suliama illua'tungiusup suliama pissusiviusut pillugit tusarniaavigineqarnermi saniatigut suliap inatsiseqartitsinikkut uppernarsaasersuinnik kullu tunngavia pillugu aamma tusarniaavigineqartussaana. Taamaalilluni suliama illua'tungiusoq aalajangiinnermut tunngaviusut tamarmiusut pillugit isumminik tusarniaavigineqassaaq, aamma paasissutissat pineqartut oqartussaasup pigigai paasissutissallu pineqartut oqartussaasup aalajangiinissaanut tunngaviusunut ilaasut suliama illua'tungiusup nalunngereeraluarpaguluunniit.

Taamaattumik oqartussaasup atorfeqartitsineq pillugu inatsiseqartitsineq tunngavigalugu pineqaatissiissutiginiakkatut eqqarsaatigineqartumut tunngaviusoq pillugu suliama illua'tungiusup isumaanik tusarniaalluni atorfeqartitaasumut allakkat makkuninnga imaqartut suliarissavai:

- Pissutsit oqartussaasup pingaartillugit isiginiagai,
- oqartussaasup suliamik paasinninnerigallagaa,
- uppersaatit pillugit naliliisoqarsimappat naliliinerit taakku,
- oqartussaasup suliami inatsiseqartitsinikkut apeqqutit pillugit isumaa, matumani inatsisini malittarisassat suut atussamaarneqarnerat taakkualu suliamut pineqartumut qanoq attuumassuteqarneri ilanngullugit eqqarsaati-galugit.

Suliami illua'tungiusup isumaanik tusarniaanermut tunngaviup eqqortuunera sukumiisuuneralu oqartussaasup qulakkiissallugu pisussaaffigaa. Tamatuma manna nassataraa, tassalu pissutsit soraarsitsinermut tunngavilersuutaasut erseqqissar-neqarsimallutillu ilimanaateqartunngortinneqarsimanissaat oqartussaasup sulia-mi illua'tungiusup isumaanik tusarniaanikkut qulakkeersimassagaa. Taamaattu-mik pisut qanoq issusiat apeqqutaatillugu pisunut piffissalernerneqarsinnaasunut sumiiffilerneqarsinnaasunullu innersuussisoqartariaqartartussaavoq.

Suliami illua'tungiusup isumaanik tusarniaanerup piumasaqaataanerata isum-merfiginissaanut siusinnerusukkut periarfissaqarsimavunga. Tamatumunnga ata-tillugu 2018-2 aamma 2021-2 nittartakkanni [www.ombudsmandi.gl](http://www.ombudsmandi.gl)-imi atuar-neqarsinnaasut innersuussutigaakka.

Siusinnerusukkut oqaaseqaatiga 2015-5.1 taamatuttaaq innersuussutigaara, tas-sanilu pineqartoq tassaavoq suliffeqarfiup sulisumik soraarsitsinissaq sioqqullu-gu suliami illua'tungiusup isumaanik tusarniaaviginninnermini pisut sulisulluun-niit pineqartut taanagit suleqatigiinnermi ajornartorsiutinik taakkartuisimamera, sulisullu pineqartup ataatsimut isigalugu pingaarnerusutigullu pissusilersuutaa-nik isornartorsiuisimamera. Suliami tassani suliffeqarfik isornartorsiorlugu oqaa-seqaateqarpunga, uangami naliliinera unaammatt suliffeqarfiup suliami illua'tu-ngiusup isumaanik tusarniaanermi pissutsit soraarsitsinermut tunngavilersuu-taasut arlallit naammattumik erseqqissarsimangikkai.

Oluf Emborgip aamma Peer Schaumburg-Müllerip atuakkiaanni "Offentlig ar-bejdsret"-imi aappasaanik naqitertinneqartumi (2010-meersumi) quppernerit 51-52 aamma Niels Fengerip atuakkiaani "Forvaltningsret"-imi siullermeertumik

naqitertinneqartumi (2018-imeersumi) quppernerit 590-592 aammattaaq inner-suussutigaaakka.

### **3.2. Suliami illua'tungiusup isumaanik tusarniaanerup amigaateqarnerani inatsiseqartitsinikkut sunniutit**

Suliami illua'tungiusup isumaanik tusarniaaneq naammattumik ersarissuseqanngippat oqartussaasup suliami illua'tungiusup isumaanik tusarniaanerata siunertani eqqortinngitsoorsinnaavaa, innuttaasormi isornartorsiutigineqartunik isummerfiginninnissaminut periarfissaarussinnaammat taamalu suliami illua'tungiusup isumaanik tusarniaanermut sukumiisumik akissuteqarsinnaajunnaarsinnaalluni.

Suliami illua'tungiusup isumaanik tusarniaanngitsoortoqarpat suliamiluunniit illua'tungiusup isumaanik tusarniaaneq amigaateqarpat tamanna kukkusumik aalajangiisoqarneranik nassataqarsinnaavoq, aalajangiinissamummi tunngaviusoq kukkusuummat naammannaniluunniit. Taamaattumik suliami illua'tungiusup isumaanik tusarniaaneq malittarisassatut qulaarnaveeqqutaasutut aamma taaneqartarpoq – tassalu malittarisassamik aalajangiinerup inatsimmik unioqqutitsisuunnginneranik eqqortuuneranillu qulakkeereqataasutut taaneqartarluni.

Suliami illua'tungiusup isumaanik tusarniaasarneq pillugu malittarisassaq eqqortinneqarsimanngippat suliamiluunniit illua'tungiusup isumaanik tusarniaasoqarsimanngippat aalajangiineq suliami illua'tungiusup isumaanik tusarniaasoqarsimannginneranit sunnerneqarsimassasoq taamaattumillu atuussinnaassuseqassanngitsoq ilimagineqartussaavoq taamaattumillu suliaq oqartussaasup suliareq-qittariaqartussaassallugu.

Aalajangiinerli suliami illua'tungiusup isumaanik eqqortumik tusarniaanikkut allaasumik imaqalernaviannngitsoq oqartussaasup suliami pineqartumi uppernarsarsinnaappagu suliami illua'tungiusup isumaanik tusarniaasussaataitanermik atuinnginneq suliamiluunniit illua'tungiusup isumaanik tusarniaanerup amigaateqarnera atuussinnaassuseqannginnermik nassataqassanngilaq.



Danmarkimi eqqartuussiviit periaasiata manna nassataraa, tassalu suliami illua'tungiusup isumaanik tusarniaanermi amigaataasup aalajangiinermut pingaaruteqartumik sunniuteqarsimannginnera oqartussaasup qanoq qularnaatsigisumik uppernarsaasersussagaa aalajangersimasumik eqqoqqissaartunillu tunaartari-sassaqaannginnera. Ullumikkut siusinnerusumut sanilliullugu tamatuma oqartussaasumut piunasaqaataanera annikilliarortutut ippoq.

Aalajangiineq tigussaasutigut eqqortuusooq eqqartuussivik isumaqaraangat Højesteretsip aalajangiineq suliami illua'tungiusup isumaanik tusarniaanerup amigaaqarnera suliamiluunniit illua'tungiusup isumaanik tusarniaasoqaanngilluinnarsimanera pissutigalugu suliani arlalinni atuussinnaassuseqaannginnerarneq ajorpaa.

Højesteretsip eqqartuussutaa UfR 2003.1660 aamma Vestrelandsretsip eqqartuussutaa UfR 2004.904 V tamatumunnga atatillugu innersuussutigaaq.

Suliami illua'tungiusup isumaanik tusarniaanermi amigaatip qanoq annertutigissusia/kusanaatsigissusia qanorlu erseqqitsiginera imaluunniit suliami illua'tungiusup isumaanik suliaasat suliarineqartarnerat pillugu inatsimmi § 19 imaluunniit suliami illua'tungiusup isumaanik tusarniaasussaataaannermik annertusisamik sutigut tamatigut eqqortillugu tusarniaasoqarsimanersooq pingaartillugu isiginiarneqartarpoq. Suliamimi illua'tungiusup isumaanik tusarniaaneq tassaavoq eqqortumik aalajangiisoqarnissaanik qulakkeerinneqataasoq. Taamaalilluni suliami illua'tungiusup isumaanik tusarniaaneq suliami illua'tungiusup pisumik paasisaqarnissaanut aalajangiinissamullu tunngaviumut sunniuteqarnissaanut ilumut pingaaruteqarsimanersooq pingaartillugu isiginiarneqarsinnaavoq.

Pisortani sulisitsisup suliami illua'tungiusup isumaanik tusarniaasarneq pillugu malittarisassanik eqqortitsinnginnera atuussinnaassuseqaannginnermik nassataqartoq suliami soraarsitsinermut tunngasumi naliliisoqarpat tamatuma atorfeqartitaanerup ingerlaannarnera nassatarinaviangilaa, pisulli qanorpiaq innerat apeqqutaatillugu taarsiissuteqartoqassasoq piunasaqaateqartoqaneranik nassataqarsinnaalluni.

Niels Fengerip atuakkiaani "Forvaltningsret"-imi (2018-imeersumi) quppernerit 598-imit 602-mut innersuussutigaaq.

Folketingip Ombudsmandiata ukiumoortumik nalunaarutaani FOB 2021-14 aammattaaq innersuussutigaaq.

### **3.3. Peersitsisoqarnissaanik aalajangiinermut tunngavilersuut**

Tunngavilersuisarneq pillugu malittarisassat suliassat sularineqartarnerat pillugu inatsimmi §§-ni 22-miippat 24-miillutillu, taakkulu imaattunik oqaasertaqarput:

**§ 22.** Aalajangiineq allakkatigut nalunaarutigineqaruni aalajangiinermut tunngaviusumik ilaqartinneqassaaq, suliameq peqataasumut tassunga tapersiisuulluinnanngikkuni.

[...]

**§ 24.** Aalajangiinermut tunngaviusumik nalunaarummi innersuussutigineqassapput inatsisini maleruaqqusat aalajangiinermi tunngavigineqartut. Maleruaqqusat tamakku malillugit aalajangiineq oqartussaasuni sulisut isumaannik tunngaveqarpat tunngaviusumik nalunaarummi taaneqassapputtaaq pissutaasut pingaarnerusut isummat tamakkua atornerannut aalajangiisuunerusut.

*Imm. 2.* Tunngaviusumik nalunaarummi pisariaqarpat naatsumik erseqqissarneqassapputtaaq paasissutissat suliameq pissusiviusunut tunngasut aalajangiinermi anner-tuumik pingaartinneqartut.

*Imm. 3.* [...]"

Suliassat sularineqartarnerat pillugu inatsit pillugu oqaaseqaatinil ilaatigut makku erserput:

"Tunngavilersuut nassuiaataassaaq aalajangiinerup sooq taamatut imaqarneranut.

Tunngavilersuutip aalajangiineq pillugu nalunaarutigineqartussap qanoq erseqqissarneqarluartigisariaqarnera eqqoqqissaartumik allaaserineq ajornarpoq.

Akissutissap qanoq ittuunissaanut ilaatigut aalajangiisuusariaqarpoq suliameq illua'tu-ngiusup akineqartussap suliap sularineqarnerani suliallu pissusianut qanoq suleqataal-

luartigisimanera. Taamaattumik aalajangersakkami killilerneqarput tunngavilersuutitut nalunaarummi ilanngunneqartussat.

[...]

[§ 24,] Imm. 2 malillugu tunngavilersuummik nalunaarummi pisariaqarpat naatsumik erseqqissarneqassapputtaaq paasissutissat suliami pissusiviusunut tunngasut, aalajangiinermi annertuumik pingaartinneqartut. Oqartussaasup suliami pisimasuiit pillugit isumaa qanoq annertutigisumik erseqqissartariaqarnerseq isummerfigissagaanni ilaatigut paaseqqaartariaqarpoq tamanna isumaqatigiinngissutaasimannginnersoq, kiisalu aamma suliami illua'tungiusoq tamatuminnga ilisimasaqareersimannginnersoq, soorlu suliami allagaatinik paasitinneqarumanermi siusinnerusukkut akuerineqarneranut atatillugu."

Inatsiseqartitsinikkut innarlitsaaliinermi isiginiagassat suliassat suliarineqartarnerat pillugu inatsimmi tunngavilersuisarneq pillugu inatsimmut tunngaviusut manna nassataraat, tassalu paasissutissat suut aalajangiinermut tunngaviunerat nalornissutigineqassanngitsoq.

Inatsisilerineq pillugu atuakkiaasuni nalinginnaasumik ilimagineqarpoq suliami pissusiviusut pillugit nassuiaasoqassappat nassuiaatip taamaattup qanoq sukumiitiginissaanik apeqqummi suliamut tunngaviusoq pisariusuunersoq nalorninarnersorluunniit aamma suliami illua'tungiusumit ilisimaneqarluarnersoq ilaatigut apeqqutaasoq. Suliani suliami pissusiviusut assortuussutaaffigisaanni oqartussaasup tamanna pillugu isummani paasissutissallu sorliit pingaartillugit isiginiarneqarsimanerat aammattaq nassuiartariaqarpaa.

Suliani atorfinitsitsisarneq pillugu inatsiseqartitsinermut tunngasuni tunngavilersuisarnissamik piunasaqaatip isummerfiginissaanut siusinnerusukkut periarfisaqarsimavunga. Suliaq 2018-2 tamatumunnga atatillugu innersuussutigaa, taannalu nittartakkanni [www.ombudsmandi.gl](http://www.ombudsmandi.gl)-imi atuarneqarsinnaavoq.

Ilaatigut Sten Bønsingip atuakkiaani "Forvaltningsret – Lærebog for statskunds-kab"-imi (2016-imeersumi) qupperneq 263, Karsten Revsbechip allallu atuakkiaanni "Forvaltningsret – sagsbehandling"-imi arfineq aappasaanik naqitertin-

neqartumi (2014-imeersumi) qupperneq 313 aamma Steen Rønsholdtip atuak-  
kiaani "Forvaltningsret – Retssikkerhed, proces, sagsbehandling"-imi aappassaa-  
nik naqitertinneqartumi (2006-imeersumi) qupperneq 152 innersuussutigaaqka.

Folketingip Ombudsmandiata oqaaseqaataani isummat taakkununga assingusut  
aammattaaq innersuussutigaaqka, ass. tak. 1990-imi ukiumoortumik nalunaa-  
rummi qupperneq 359 aamma 2007-imi ukiumoortumik nalunaarummi qupper-  
neq 607.

#### **4. Kommunip isumaa**

Kommunip uannut oqaaseqaataani 14. marts 2022-meersumi kommunip makku  
ilaatigut oqaatigai:

"[...]

[A] Meeqqanut Ilaqutariinnullu Ingerlatsivimmi [illoqarfimmiittumi] sulianik suliarinnit-  
tutut 1. juli 2021-mi atorfinitsinneqarpoq.

##### **1 pillugu:**

[A-p] pisortarisaata suliami illua'tungiusup isumaanik tusarniaalluni allakkat ilanngus-  
sallu [A-mut] 31. august 2021-mi nassiuppai. Uanga paasinninnera unaavoq malitta-  
risassat atuuttut tunngavigalugit paasitinneqarsimasoq, tassami nammineq atsiorsi-  
mammatt allagaatillu tamaasa tigusi-mallugit.

Tassani suliami illua'tungiusup isumaanik tusarniaanermut akissuteqarnissamut piffis-  
saliisoqarsimavoq, pineqartulli periarfissaq taanna atorsimangilaa.

Aalajangiineq K.S.-ip [Kommuneqarfik Sermersuup] pineqartumut 9. september 2021-  
mi nassiuppaa, pineqartullu tigusaqarnini uppersarlugu aamma atsiorsimalluni.

Tassani pineqartoq sivikippallaamik piffissalernerqarsimanersoq taamaanginnersor-  
luunniit K.S.-ip isummerfigisinnaangilaa, pineqartormi suliap ingerlanerani tamarmi  
tutsaqarsimangilluinnarmat (tassa suliami illua'tungiusup isumaanik tusarniaanermiit  
aalajangiinerup tungaanut).

##### **2 pillugu**

Kommuneqarfik Sermersuumi Sulisoqarnermut Immikkoortortaqarfik HR Meeqqanut Ilaqutariinnullu Ingerlatsiviup [...] pisortaanit paasitineqarpoq [illoqarfimmi] isumaginninnermut immikkoortortaqarfiup pisortaa [meeqqanik inuusuttunillu paaqqinniffiup] Kalaallit Nunaanni kommunini isumaginninnermut immikkoortortaqarfiit meeqqanik inuusuttunillu inissiivigisartagaata pisortaanit attaveqarfigineqarsimasoq.

[Ulloq unnuarlu paaqqinniffiup] pisortaata oqaatigaa niviarsiaqqat marluk [-mi] najugaqartut suliamik suliarinnittup [A-p] [illoqarfimmi] atorfeqartitaasup killissamik qaangiilluni kannguttaatsuliorlunilu saaffiginnissutigisartagai unitsinniarlugit ikioqqusimasut.

Pisortap oqaatigaa [A-p] kinguaassiuutini assileriarlugu assinik nassiussisarsimasoq, niviarsiaqqallu taakku marluk atoqatigiumallugit ("kujatta"-mik) allattalersimasoq.

Kommunip tamanna tunngavigalugu paasinninnera unaavoq iliuuseq taanna peersitsinissaq pillugu suliamik aallartitsinissamut tunngavissaliisoq.

Tamanna suliami illua'tungiusup isumaanik tusarniaanermi [A-mut] 31. august 2021-mi nassiunneqartumi quppernermi 1-imi immikkoortup kingulliup siuliani paasissutissiissutigineqarpoq.

### **3 pillugu**

Kommunip paasinninnera unaavoq pineqaatissiissut taanna iliuuserineqartumut naapertuuttusoq, tassami iliuutsip suliffimmut kiisalu atuisunut/sullitanut (ilaatigut niviarsiaqqanut inuusuttuaqqanut taaneqartunut) attuumassuteqartumik pisimanera isiginiarneqarmat.

Isumaginninnermi immikkoortortaqarfiup saaffiginnissutaa tiguneqarmat [A-p] immikkoortortaqarfimmit peersinneqarnissaa kissaatigineqarsimavoq. Meeqqanik taakkuninnga [illoqarfimmi] isumaginninnermi immikkoortortaqarfimmit inissinneqarsimasunik (taamaattuminguna [ulloq unnuarlu paaqqinniffik] ikioqqulluni isumaginninnermi immikkoortortaqarfiup pisortaanut saaffiginnissimasoq) sullissineq pineqarmat meeqqat toqqissisimanissaat pingaarnertutinneqarpoq, pineqartullu iliuutsimik ingerlatseqqinnissaa annilaanngatigiinnarumanagu [ulloq unnuarlu paaqqinniffiup] pisortaata [A] politiinut 30. augustimi suliassanngortissimavaa.

Suliami illua'tungiusup isumaanik tusarniaanermi ilaatigut oqaaseq (sulisoqarneq pillugu quppersakkamisut) una atorneqarpoq:

**"Ingerlaannartumik atuutilersumik soraarsitsineq.** Ingerlaannartumik atuutilersumik soraarsitsisoqarsinnaavoq atorfeqartup atorfeqarnermini pissaaffigisani annertuumik unioqutippagit.

Atorfeqartuq suliffimminit ingerlaannartumik atuutilersumik soraarsinneqarsinnaavoq, soorlu assersuutigalugu atorfeqartuq annertuumik unneqqarinngitsumik iliuuseqarsimappat, pisortamut, suleqatigisamut imaluunniit sullitamut nakuusersimaguni, aningaasanik peqquserluuteqarsimaguni aamma tillissimaguni, suliasaminik suliaqarnissaminut naaggaarsimaguni imaluunniit atorfeqartitaanini annertuumik atornerlussimaguniuk."

"Atorfeqartitaanini annertuumik atornerlussimaguniuk"-mik oqarneq tassarpiaavoq meeqqanik inuusuttunillu illersuilluni suliasamik sumiginnaaneq, isumaginninnermi immikkoortortaqarfimmit annertuumik atornerluinertut isigineqartuq.

#### **4 pillugu**

Ulloq atorfinitsitsiviusoq eqqortoq tassaavoq 1. juli 2021.

#### **5 pillugu**

Ilanngussanit ersertutut pineqartup allaffiginnittarnini majimi (atorfinitsinneqarnissani sioqqullugu) aallartissimavaa, 2021-milu junimi aamma augustimi nangittarsimallugu. Allannerminilu tamani nalunngilluinnarsimavaa oqaatigisani, apeqqutigisani kaammattuutigisanilu tamarmik atoqatigiinnermut tunngasuusut. Niviarsiaqqanik (angerlarsimaffimmik avataanut inissinneqarsimasunik) atoqatigiinnermut tunngasutigut pinnerliiniarneq oqarasuaatikkut ingerlanneqartuq, namminerlu 29-nik ukioqarluni.

#### **6 pillugu**

Kommuneqarfik Sermersuup pineqartumik 2021-mi junip naanerani atorfinitsitsinermini pineqartup atorfinitsinneqarnissani sioqqulluguli niviarsiaqqanut allattalereersimanera ilisimasimangilaa, tamannalu aatsaat paasillugu augustip naajartulernerani, 21. augustimi, pineqartup atisaqarnani assinginik atoqatiginnikkumasumillu allartarnera unitsinniarlugu ikioqqullutik qinnuiginnimmata. Tassa imaappoq ulloq akuerineqarsinnaanngitsumik pissusilersornerup aallartiffia kommunip taasariaqarsimagaa, pisup ingerlasimanera erseqqisumik takutissinnaajumallugu.

## **7 pillugu**

Pineqartup atisaqarani assini pisortap oqarneratut siullermik 17. augustimi nassiussimavaa, tamannalu ilanngussani suliami illua'tungiusup isumaanik tusarniaalluni allakanut ilanngullugit nassiunneqartuni takuneqarsinnaavoq.

## **8 pillugu**

Kommunip atit erseqqissarsinnaangilai, paasissutissarmi taanna [ulloq unnuarlu paaqqinniffiup] pisortaata oqaasiinnartigit saaffiginnissutaatigit pissarsiarineqarsimamat, tak. [...-p] e-mailia 30. august 2021 nal. 10.17 nassiunneqarsimasoq "Kikut Saaffigissavagut?"-mik qulequtaqartoq.

## **9 pillugu**

[...-p] saniatigit meeqqat allat kikkuussusii kommunip naluai.

## **10 pillugu**

[Ulloq unnuarlu paaqqinniffiup] pisortaata nalunaarutiginninnerata tiguneqarneranut uppersaat Kommuneqarfik Sermersuup piginnigilaa, taamatuttaarlu isumaginninnermi immikkoortortaqarfiup pisortaa tamatuminnga politiinut suliassanngortitsisimanersoq HR-ip uppersarsinnaanagu.

## **11 pillugu**

Politiinut 9. september 2021-mi suliassanngortitsineq uppersarneqarsimanersoq Kommuneqarfik Sermersuup qulakkeersimanngilaa, ilimagaluguli suliaq [ulloq unnuarlu paaqqinniffiup] pisortaanit politiinut suliassanngortinneqarsimasoq, kiisalu pineqartup sullitaminut sms-ikkut (ilanngussami takutinneqartukkut) attaveqarfiginnissimanageranik paasisaqarsimaneq aallaavigalugu kommuni naliliivoq pineqartoq atorfigisami niiginnarnissaminut naleqqukkunnaartoq tatiginnigikkippullu." (Ombudsmandeqarfirmi nutsigaavoq)

Kommunip ilassutaasumik uannut oqaaseqaammini 11. august 2022-meersumi ilaatigut makku oqaatigai:

"[...]

Allakkani 4. april 2022-meersuni Ombudsmandip allagaani 4. marts 2022-meersuni 2022-324-0001-8-mik normoqartuni immikkoortoq 1 innersuussutigineqarpoq, tassa-nilu Ombudsmandi ilaatigut imatut allappoq:

“Kommuni tamanna tunngavigalugu qinnuigaara suliap ingerlasimaneranik suliami illua’tungiusup isumaanik tusarniaalluni allakkani 31. august 2021-meersuni aamma aalajangiinermi 9. september 2021-meersumi allaaserinninnerup [A] aalajangiinermut pissusiviusunik, uppersaatinik inatsiseqartitsinermilu tunngaviusumik tamarmiusunik paasisaqarnissaanut periarfissikkaa kommuni isumaqarnerisooq oqaaseqaammi nassuiaqqullugu.

Tamatumunnga atatillugu oqaatigaara uanga paasinninnera unaasoq sulisup peer-sinneqartup kina innarlerneqarsimasooq, taanna taakkuluunniit qanoq iliornikkut innarlerneqarsimasut kiisalu innarliineq innarliinerilluunniit qanga pisimanerat suliami illua’tungiusup isumaanik tusarniaalluni allakkat aalajangiinerlu tunngavigalugit ilisimasussaagai.”

### **Kommunip akissutaa:**

Suliami illua’tungiusup isumaanik tusarniaalluni allakkanit 31. august 2021-meersunit erserpoq ulloq unnuarlu paaqqinniffimmi [...-mi] inissinneqarsimasooq suliamik suliarinnittumit suliami illua’tungiusutut isummaminik tusarniaavigineqartumit innimiillisaarfigineqarsimasooq. Innimiillisaarfiginninnerup qangarpiaq pisimanagera ilanngussani suliami illua’tungiusup isumaanik tusarniaalluni allakkanut ilanngullugit nassiunneqartuni takuneqarsinnaavoq. Taamaalilluni tunngavippiaasoq uppersaasersuinkullu tunngaviusooq suliami illua’tungiusup isumaanik tusarniaanermi ilanngunneqarsimapput. Suliami illua’tungiusup isumaanik tusaarniaanermi inatsiseqartitsinikkut tunngavigisaq aqutsinnaatitaanermut innersuussutitut aamma iliutsit innarliisut tatinginninnermik tusaamaneqarnermillu ajoqusiineranik tikkuaanikkut ilanngunneqarsimavoq.

Aalajangiinermi 9. september 2021-meersumit erserpoq nassiussat suut [ulloq unnuarlu paaqqinniffimmi] innarliisuusimasut piffissami 2021-mi junimi julimilu pisimasut. Uppersaasiussanit suliami illua’tungiusup isumaanik tusarniaanermut ilanngullugit nassiunneqartunit erserpoq nassiussat innarliisut aamma 2021-mi augustimi nassiunneqarsimasut. Taamaalillutik pissusiviusut uppersaasiussallu aalajangiinermi aamma ilanngunneqarsimapput.



Aalajangiinermut 9. september 2021-meersumut inatsiseqartitsinikkut tunngavigisaq kommunip sulisoqarneq pillugu mappersagaanik issuakkamit erserpoq, tassanilu atorfeqartitaasup atorfeqartitaanermi pisussaaffimminik annertuumik unioqqutitsinera innersuussutigineqarpoq, mappersakkamilu taaneqartut tassaallutik sullitamut kusa-naatumik ilumoorfiginninngitsumik iliuseqarneq, persuttaaneq imaluunniit atorfeqartitaanermut tunngasunik annertuumik atorneqarpoq. Naliliineq unaavoq atorfeqartitaasup atorfimmini pisussaaffini kommunip sullitaanik innimiilliofiginninermigut annertooujussuarmik unioqqutissimagai.

Kommunip naliliinera unaavoq suliami illua'tungiusup isumaanik tusarniaalluni allakkat 31. august 2021-meersut aamma aalajangiineq 9. september 2021-meersoq [A-p] aalajangiinermut pissusiviusutigut, uppersaasarsuinikkut inatsiseqartitsinikkullu tunngavigisaanik paasisaqarnissaanut tamakkiisumik periarfissiisuusut.

Allakkani 4. april 2022-meersuni Ombudsmandip allagaani 4. marts 2022-meersuni 2022-324-0001-8-mik normoqartuni immikkortoq 2 innersuussutigineqarpoq, tassanilu Ombudsmandi ilaatigut imatut allappoq:

“Tamatumunnga atatillugu oqaatigaara peersitsinermut pissutaasut kommunip sulisunut mappersagaani taaneqartut tulleriarlugit allatorneqarsimagaluartut pisut ataasiakkaarlugit pissusiviusutullu tunngaviusut ataasiakkaarlugit naliliisoqartartussaasoq.

Aamma oqaatigaara kommunip oqaaseqaammi 14. marts 2022-meersumi immikkoortumi 3-mi oqaatigigaa pisoq annertuumik unioqqutitsinertut isigineqartoq. Tunuliaqutaasulli annertuumik kusanaatumillu unioqqutitsinertut sooq isigineqarnerat kommunip erseqqissumik allaaserisimanngikkaa takusinnaavara.

Kommuni tamanna tunngavigalugu qinnuigeqqippara taanna pillugu nassuiaateqaq-qullugu.”

### **Kommunip akissutaa**

Kommunip akissutaani immikkoortumi 3-mi nassuiaammi 14. marts 2022-meersumi 3 pillugu oqaatigineqartuni oqaaseqatigiinnit kingullernit erserpoq kommunimi meeqqat inuusuttullu pillugit sulianik suliarinnittup meeqqanik inuusuttunillu illersuinermik

suliassaqtup tamatuma paarlattorluinnaanik meeqqanik inuusuttunillu taakkuninnga innimiillioffiginninnera kommunip atorfeqartitaanermut tunngasunik annertuumik unioqqutitsinertut isigigaa.

Meeqqat inuusuttullu sanngiitsut kommunip isumassuinermi suliassamik tiguisimanagera pissutigalugu najugaqarfinni inissinneqarsimasut tassani tapersersuinerup ilaatut kommunimi taannaasumi immikkoortortaqaarfimmi atorfeqartitaasumit innimiillioffigineqassanngillat, immikkoortortaqaarfiummi taassuma suliassarimmagu meeqqat inuusuttullu inissinneqartut sulinermi pitsaasumik illersorneqarsinnaasumillu pissusilersorfigissallugit, inissinneqartut taakkua 18-it inorlugit sinnerlugilluunniit ukioqarnerat apeqqutaatinnagu, aamma innarliinerit inuusuttumut inuusuttunulluunniit arlalinnut atatillugu pinerat apeqqutaatinnagu.

[A-p] meeqqanut inissinneqartunut pineqartunut suliatigut pitsaasumik illersorneqarsinnaasumillu pissusilersornissamik piumasaqaammik (dekorum) eqqortitsisinnaannginnera, kommunimili meeqqanut ilaqutariinnullu ingerlatsivimmi atorfeqartitaanermi misilinneqarfimmi nalaani taakkuninnga kinguaassiuutinut tunngasutigut malersuinermigut taakkuninnga innarliisimanagera kommunip atorfeqartitaanermut tunngasunik kusanaatsumik annertuumillu unioqqutitsinertut isigaa." (Ombudsmandeqarfimmi nutsigaavoq)

## **5. Uanga naliliinera**

### **5.1. Peersitsinermi suliامي illua'tungiusup isumaanik tusarniaaneq**

**5.1.1.** Aallaqqaasiutitut oqaatigaara A-p sulisuma ilaannik oqarasuaatikkut 18. januar 2022-mi oqaloqateqarnermini oqaatigigaa peersitsisoqarnissaanik aalajangiineq sioqqullugu suliامي illua'tungiusup isumaanik tusarniaanermik tigusaqarsimanani.

Suliamili allagaatini kommunip uannut nassiusaani ilaavoq tigusaqarnermut up-  
pernarsaalluni atsiugaq 31. august 2021-meersoq A-p atsiorsimasaa.

Taamaattumik tunngaviutippara A-p suliامي illua'tungiusup isumaanik tusarniaalluni allakkat ulloq taanna tigusimagai.

**5.1.2.** Kommunip suliامي illua'tungiusup isumaanik tusarniaanermi oqaatigaa A sulianik suliarinnittutut 1. juni 2021-mi atorfinitsinneqarsimasoq. Kommunilli

uannut oqaaseqaammi 14. marts 2022-meersumi oqaatigaa A aatsaat 1. juli 2021-mi atorfinitsinneqarsimasoq.

Uanga tamanna tunngavigalugu paasinninnera unaavoq A-p kommunimi atorfinitsinneqarnini sioqqullugu pissusilersorsimanera kommunip suliami illua'tungiusup isumaanik tusarniaanermi pingaartillugu isiginiarsimagaa.

Kommunip uannut oqaaseqaammini 14. marts 2022-meersumi oqaatigaa A kommunimi atorfinitsinneqarnini sioqqullugu ulloq unnuarlu paaqqinniffimmi najugaqartumik allaffigeqatiginnittarsimasoq. Kommunip tamanna tunngavigalugu oqaatigaa "ulloq akuerineqarsinnaanngitsumik pissusilersornerup aallartiffia kommunip taasariaqarsimagaa, pisup ingerlasimanera erseqqissumik takutissinnaajumallugu." (Ombudsmandeqarfimmi nutsigaavoq)

Oqaatigaara kommunip allaffigeqatigiittarsimaneq A-p inuullu atiatigut taaneqanngitsup akornanni A-p atorfinitsinneqarnera sioqqullugu pisimasoq innersuussuti-giinnanngikkaa, aammali allaffigeqatigiittarsimanerup ilaa taanna pingaartillugu isiginiaraa, kommunimmi peersitsissamaarnermut tunngavilersuutaani allaffigeqatigiinneq 21. juni 2021-mi pisimasoq ilaatigut tunngavigineqarmat.

Oqaatigaarattaaq A-p inummik atiatigut taaneqanngitsumik allaffiginneqateqartarsimanerata aallartiffia kommunip innersuussutiginnikkaa, allaffigeqatigiittarnermimmi kakkiunneqartumit ersermat A pineqartumut 19. maj 2021-mili saaffiginnissimasoq.

Uanga naliliinera unaavoq A-p inummik atiatigut taaneqanngitsumik allaffigeqatiginnittarnera 2021-mi majimi aamma 2021-mi junimi pisimasoq pingaartillugu isiginiarneqarsinnaanngitsoq, tassami A piffissami tassani kommunimi atorfeqartitaasimanngimmat.

**5.1.3.** Kommunip suliami illua'tungiusup isumaanik tusarniaanermi qulaani erseqqissarneqartutut oqaatigaa, allaffigeqatigiittarneq 2021-mi juli tikillugu ilanngullugu ingerlanneqarsimasoq.

Tamatumunnga atatillugu oqaatigaara A allaffigeqatigiittarnermi allagaasimasut ilanngullugit nassiunneqartut takutitaattut inummik atiatigut taaneqanngitsumik 2021-mi julimi allaffigeqatiginnissimangitsoq. Taamaattumik allaffigeqatigiittarneq 2021-mi julip tungaanut julilu ilanngullugu ingerlasimanerarlugu kommunip innersuussutaa paasinngilara.

**5.1.4.** A-p atisaqarani assiminik ulloq unnuarlu paaqqinniffimmi najugaqartunut nassiussisimanagera kommunip suliami illua'tungiusup isumaanik tusarniaanermi aammattaq pingaartillugu isiginiarpaa.

Allaffigeqatigiinnermi allagaasimasunit ilanngullugit nassiunneqartunit erserpoq A-p assi ataaseq inummut atiatigut taaneqanngitsumut 17. august 2021-mi nassiussimagaa.

Kommunilli 2021-mi junip 2021-milu julip akornanni allaffigeqatigiittarsimaneq kisiat suliami illua'tungiusup isumaanik tusarniaanermi innersuussutigaa.

Uanga tamanna tunngavigalugu paasinninnera unaavoq kommunip pissutsit suliami illua'tungiusup isumaanik tusarniaalluni allakkamini taakkuusuni piffissatut pisimasoqarfiusutut taasamini pineqartunut ilaatinneqanngitsut aalajangiisuusumik pingaaruteqartillugit isiginiarai.

**5.1.5.** Kommunip oqaaseqaammimi 11. august 2022-meersumi oqaatigaa killissanik qaangiinerit piffissap suup iluani pisimasut suliami illua'tungiusup isumaanik tusarniaalluni allakkani takuneqarsinnaasoq.

Paasinninneq taanna isumaqatiginngilara, kommunimmi suliami illua'tungiusup isumaanik tusarniaanermi pissutsit atorfinitsitsineq sioqqullugu pisimasut, piffissaq A-p inuullu atiatigut taaneqanngitsup allaffigeqatigiiffisarsimangisaat innersuussutigisimammagit kiisalu piffissaq A-p assimik inummut atia taaneqanngitsumut nassiussiffisaa innersuussutigisimanagu.

Kommunip uannut oqaaseqaammimi 11. august 2022-meersumi aammattaq oqaatigaa ullut killissanik qaangiiffiusimasorpiaat ilanngussani suliami illua'tu-

ngiusup isumaanik tusarniaanermut ilanngullugit nassiunneqartuni takuneqarsinnaasut.

A-p inuullu atiatigut taaneqanngitsup allaffigeqatigiittarneranni allagaasimasut tamakkerlutik suliami illua'tungiusup isumaanik tusarniaanermut ilanngullugit nassiunneqarsimagaluartut uanga naliliinera unaavoq pissutsit sorliit kommunip pingaartillugit isiginiarsimanerai A-p naammattumik ersarissuseqartumik takusinnaasimanngikkaa, kommunimmi 2021-mi junimi julimilu allaffigeqatigiittarsimaneq kisiat suliami illua'tungiusup isumaanik tusarniaanermi innersuussutigimmagu.

Uanga tamanna tunngavigalugu naliliinera unaavoq suliaq A-p paasisimanngikkaa, kommunillu pissutsinik sorlernik aalajangiisuusumik pingaaruteqartitsilluni peersitsissamaarnermut atatillugu isiginninniarsimanera paasisinnaasimanagu.

**5.1.6.** A-p atisaqarani assiminik ulloq unnuarlu paaqqinniffimmi najugaqartunut nassiussinermigut ulloq unnuarlu paaqqinniffimmi najugaqartunut killissanik qaangiilluni iliuseqarsimanera kommunip suliami illua'tungiusup isumaanik tusarniaanermi 31. august 2021-meersumi pingaartillugu isiginiarpaa.

Suliami illua'tungiusup isumaanik tusarniaanermi 31. august 2021-meersumi inuit pineqartut kikkunerit piffissalluunniit sordiaanerit taaneqanngillat. Tassunga taarsiullugu A-p pissusilersornera ataatsimut pingaarnerusutigullu isornartorsiorneqarpoq.

Atisaqarani assini A-p inummut atiatigut taaneqanngitsumut nassiussimasaa kommunip innersuussutigaa. Allaffigeqatigiinnerulli imaasa sinneri kommunip innersuussutigingilai, allaffigeqatigiinnerluunniit taanna killissanik qaangiisuusoq kommuni sooq isumaqarnerisooq allaaserinagu.

Kommunip sulisoqarneq pillugu politikkini kommunip uannut oqaaseqaammini 14. marts 2022-meersumi issuaavigaa. Tassannga ilaatigut erserpoq sulisoq atorfeqartitaanermut tunngasunik annertuumik unioqqutitsisoq ingerlaannartumik atuutilersumik peersinneqarsinnaasoq.

Tamanna kommunip oqaaseqaammi 11. august 2022-meersumi itisilerpaa, oqaatigalugulu "kommunimi meeqqat inuusuttullu pillugit sulianik suliarinnittup meeqqanik inuusuttunillu illersuineramik suliassaqtup tamatuma paarlattorluinnaanik meeqqanik inuusuttunillu taakkuninnga innimiilliorfiginninnera kommunip atorfeqartitaanermut tunngasunik annertuumik unioqqutitsinertut isigigaa". (Ombudsmandeqarfimmi nutsigaavoq)

Kommunip meeqqanik inuusuttunillu kommunip ulloq unnuarlu paaqqinniffiutaani inissineqarsimasunik kinguaassiuutinut tunngasutigut killissanik qaangiiffigininnernut illersuiniarsarinera paasilluarsinnaasorujussuara.

Tamatunngali peqatigitillugu isumaqarpunga atorfeqartitaasoq killissanik qaangiisumik pissusilersorsimaneragaasoq tamatuminnga isummerfiginninnissaminut imminullu illersornissaminut periarfissaqartinneqassasoq.

Uanga tamanna tunngavigalugu naliliinera unaavoq A-p pissusilersornera killissanik qaangiisuusimasoq kommuni sooq isumaqarnerasoq kommunip suliami illua'tungiusup isumaanik tusarniaanermi naammattumik immikkuualuttulersornagu A-mut allaaserisimagaa.

Oqaatigaara A kommunimi sulianik suliarinnittut atorfeqartitaanermiut ilaatilugu meeqqanik inuusuttunillu illersuisussatut atorfeqartitaasimanersoq apeqqut isummerfiginnikkiga.

Kommunip uannut oqaaseqaammi 11. august 2022-meersumi aammattaaq oqaatigaa A pitsaasumik illersorneqarsinnaasumillu pissusilersortussaaneermik eqqortitsisimangitsoq, taamaattumillu A-p ulloq unnuarlu paaqqinniffimmi najugaqartumik atiatigut taaneqanngitsumik allaffigeqatiginnittarsimanera kommunip atorfeqartitaanermut tunngasunik kusanaatsumik annertuumillu unioqqutitsinertut isigaa.

A-p iliuuserisimasai pitsaasumik suliatigullu illersorneqarsinnaasumik iliuuseqarsinnaangissuseqarnertut kommunip isigigai kommunip suliami illua'tungiusup

isumaanik tusarniaanermi 31. august 2021-meersumi A-mut oqaatiginnissimannginnera pingaartillugu isiginiarpara.

**5.1.7.** A-p kina killissanik qaangiisumik allaffigeqatigisarsimaneraa kommuni isumaqartoq suliami illua'tungiusup isumaanik tusarniaanermi kommunip oqaatiginngilaa.

Allaffigeqatigiinnermi allagaasimasunit suliami illua'tungiusup isumaanik tusarniaanermut ilanngullugit nassiunneqartuni ilaapput inuit attaveqatigiittarfianni allagaasimasut. Tassanili kina A-p allaffigeqatigisimaneraa takuneqarsinnaangilaq. Kommunip uannut oqaaseqaammini 14. marts 2022-meersumi oqaatigaa tassani pineqartoq tassaasoq ulloq unnuarlu paaqqinniffimmi najugaqartoq, taamaattumillu tamanna tunngaviutippara.

Kommunip suliami illua'tungiusup isumaanik tusarniaanermi 31. august 2022-meersumi inuk ataasiinnaq innersuussutiginnigilaa, ullorli unnuarlu paaqqinniffimmi najugaqartut innersuussutigalugit. Najugaqartut qassit A-p killissanik qaangivigisimagai kommuni isumaqartoq suliami illua'tungiusup isumaanik tusarniaalluni allakkani takuneqarsinnaangilaq.

Kommunip uannut oqaaseqaammini 14. august 2022-meersumi oqaatigaa ulloq unnuarlu paaqqinniffimmi najugaqartut marluk A-p pissusissaanngitsumik killissanillu qaangiisumik iliuseqarnera unitseqqullugu ikioqqusimasut.

Ulloq unnuarlu paaqqinniffimmi najugaqartup ataatsip A-mit killissanik qaangiisumik allaffigeqatigineqartarsimasutut kommunip isigisaata atia kommunip oqaaseqaammi tassani paasissutissiissutigaa. Kommunip allat atii erseqqinnerusumik paasissutissiissutigisinnaangikkai kommunip tamatumunnga peqatigitillugu oqaatigaa.

Uanga naliliinera unaavoq A-p inuit kikkut qassillu killissanik qaangiisumik allaffigeqatigisarsimagai kommuni isumaqartoq kommunip suliami illua'tungiusup isumaanik tusarniaanermi erseqqissumik oqaatigisimasariaqaraluaraa.

**5.1.8.** Kommuni suliami illua'tungiusup isumaanik tusarniaalluni allakkani oqaatigaa A atisaqarani assimini ulloq unnuarlu paaqqinniffimmi najugaqartunut nassiussisimasoq.

Uanga tamanna tunngavigalugu paasisara unaavoq kommuni isumaqartoq A atisaqarani assimini ataasiaannarani nassiussisimasoq.

Kisianni A ulloq unnuarlu paaqqinniffimmi najugaqartumut assimik ataasiaannarani nassiussisimasoq ilanngussani kommuni suliami illua'tungiusup isumaanik tusarniaalluni allakkanut kakkiussimasaani takusinnaangilara.

Aamma oqaatigaara A-p atisaqarani assimik ataatsimik arlalinnilluunniit qanga nassiussisimane kommuni erseqqissumik innersuussutiginnikkaa.

Uanga tamanna tunngavigalugu naliliinera unaavoq kommuni peersitsissamaarnermut uppersaasersuinikkut tunngavigisaq A-mut naammattumik ersarissusilimmik ilisimatitsissutigisimannikkaa.

**5.1.9.** Ataatsimut isiginnillunga naliliinera unaavoq kommuni suliami illua'tungiusup isumaanik tusarniaalluni allagai 31. august 2021-meersut suliami illua'tungiusup isumaanik tusarniaasaneq eqqarsaatigalugu suliassat sularineqartarnerat pillugu inatsimmi § 19 aamma suliami illua'tungiusup isumaanik tusarniaanissamat annertusisamik pisussaaffik inatsisikkut aalajangersagaanngitsoq tunngavigalugit piumasaqaataasunik eqqortitsisuunngitsut.

Taamaalillunga naliliinera unaavoq suliami illua'tungiusup isumaanik tusarniaannermi allakkat 31. august 2021-meersut amigaatilerujussusut, tassami

- A-p inummik atiatigut taaneqanngitsumik 2021-mi junimi allaffigeqatigininnerani allagaasimasut kommuni innersuussutigimmagit, naak A aatsaat 2021-mi julimi atorfinitsinneqarsimagaluartoq,
- A-p inummik atiatigut taaneqanngitsumik 2021-mi julimi allaffigeqatigininnerani allagaasimasut kommuni innersuussutigimmagit, naak suliami



- illua'tungiusup isumaanik tusarniaalluni allakkanut ilanngussatut kakkiussamit erseraluartoq 2021-mi julimi allaffigeqatigiittoqarsimangitsoq,
- A-p atisaqarani assiminik inummut atiatigut taaneqanngitsumut 2021-mi augustimi nassiussisimanagera kommunip innersuussutiginnimmagu, naak assimik taassuminnga nassiussineq aalajangiisuusumik pingaaruteqartillugu isiginiarsimagaluarlugu,
  - najugaqartut arlallit A killissanik qaangiisuusumik allaffigisimasaatut isigigini kommunip innersuussutiginnimmagu, taakkua kikkuussusii erseqqinnerusumik taanagit,
  - A atisaqarani assimik ataasiaannarani nassiussisimasoq kommunip innersuussutiginnimmagu, naak suliami illua'tungiusup isumaanik tusarniaalluni allakkanut ilanngussatut kakkiussamit erseraluartoq A-p asseq ataasiinnaq inummut atiatigut taaneqanngitsumut nassiussimagaa aamma
  - A-p allaffigeqatiginnittarnerata sooq killissanik qaangiisuunera kommunip allaaserinngikkaa, taamaallaalli pissutsit ataatsimut pingaarnerusutigullu allaaseralugit.

Kommunip suliami illua'tungiusup isumaanik tusarniaalluni allagai tamanna tunngavigalugu ajuusaarnartutut isigaakka.

**5.1.10.** Naggasiutitut oqaatigaara kommunip uannut oqaaseqaammini 14. marts 2022-meersumi oqaatigigaa suliami illua'tungiusup isumaanik tusarniaaneq malittarisassanik atuuttunik eqqortitsisusoq, suliamimi illua'tungiusup isumaanik tusarniaanerup tiguneqarneranut uppersaat A-p nammineq atsiorsimammagu. Taamaalluni kommunip oqaatigaa kommunip suliasat suliarineqartarnerat pillugu inatsimmi malittarisassanik tunngavinnillu eqqortitsisimanagera A-p atsiornerata qularnaveeqqusiiffigigaa.

Kommunip taamatut paasinninnera isumaqatiginngilara, uangami naliliinera unaammatt kommunip suliasat suliarineqartarnerat pillugu inatsimmi malittarisassanik suliamiluunniit illua'tungiusup isumaanik tusarniaanissamut pisussaaffimmik annertusisamik inatsisikkut aalajangersagaanngitsunik malinninneranut akisussaaffik innuttaasunut tutsinnianngisaannartussaagaa.

## **5.2. Suliami illua'tungiusup isumaanik tusarniaanermi amigaatit inatsiseqartitsinikkut sunniutaat**

**5.2.1.** A-p inummik atiatigut taaneqanngitsumik allaffigeqatiginninnerani allagaasimasut kommunip suliami illua'tungiusup isumaanik tusarniaanermut 31. august 2021-meersumut ilanngussatut kakkiussimavai. Peersitsissamaarnermi ullut sorliit kommunip pingaartillugit isiginiarsimanerai kommunip suliami illua'tungiusup isumaanik tusarniaanermi erseqqilluinnartumik innersuussutiginnikka-luarai uanga naliliinera unaavoq kommunip allaffigeqatigiinnermi allagaasimasut tamaasa peersitsinissamik isumaliutersuuteqarnermini ilaatissimagai A-mut erseqqissimassasoq.

**5.2.2.** Uanga tamanna tunngavigalugu naliliinera unaavoq A-p, suliami illua'tungiusup isumaanik tusarniaaneq amigaateqaraluaqisoq, suna kommunip peersitsiniarnerminut tunngavigigaa qularutigisinnaasimanngikkaa, naak tamanna suliami illua'tungiusup isumaanik tusarniaanermi erseqqinnerusumik oqaatigineqarsimasinnaagaluartoq.

Uanga naliliinera taamaalilluni unaavoq suliami illua'tungiusumik tusarniaanermi amigaataasoq A-p pisunik paasinninnissaminut aalajangiinermilu tunngaviusumut sunniuteqarnissaminut periarfissaanut aalajangiisuusumik sunniuteqarsimanngitsoq.

Uanga eqqartuussiviit periaasiat Folketingillu Ombudsmandiata oqaaseqaatai tunngavigalugit naliliinera unaavoq peersitsisoqarnissaanik tamatuma kingornatigut aalajangiineq suliami illua'tungiusup isumaanik tusarniaaneq imarisamigut amigaateqaraluartoq atuussinnaassuseqassasoq.

Tamatumunnga atatillugu oqaatigaara uanga naliliinera unaasoq suliami illua'tungiusup isumaanik tusarniaanerup amigaateqarnera annertuujunngitsoq erseqqivissuunanilu, pineqartorli tassaaginnartooq pissusiviusutigut tunngavigisat amigartumik erseqqissarneqarsimanerat, taamaattumillu suliami illua'tungiusup isumaanik tusarniaanerup pissutsini tamarmiunngitsuni suliassat suliarineqartarnerat pillugu inatsimmi § 19-imi aamma tusarniaasussaataaneq annertusisaq inat-

sisikkut aalajangersagaanngitsoq tunngavigalugit piumasaqaammik eqqortitsi-suunera.

Oqaatigaarattaq A kommunip suliami illua'tungiusup isumaanik tusarniaaneranut oqaaseqaatiminik saqqummiussinissaminut periarfissaminik 9. september 2021-mi aalajangiineq sioqqullugu atuisimannngitsoq.

### **5.3. Peersitsinissamik aalajangiinermut tunngavilersuut**

**5.3.1.** Matuma siuliini eqikkaallunga inerniliivunga peersitsissamaarneq pillugu suliami illua'tungiusup isumaanik tusarniaalluni allakkat 31. august 2021-meersut arlalitsigut amigaateqartut. Uanga naliliinera unaavoq peersitsisoqarnissaanik aalajangiineq amigaatit taakkuusut ilarpassuinik aamma amigaateqartoq.

Taamaalilluni uanga naliliinera unaavoq aalajangiineq 9. september 2021-meersuq amigaateqartoq, tassami:

- A-p inummik atiatigut taaneqanngitsumik 2021-mi junimi allaffigeqatigininnerani allagaasimasut kommunip innersuussutigimmagit, A aatsaat 2021-mi julimi atorfinitsinneqarsimagaluartoq,
- A-p inummik atiatigut taaneqanngitsumik 2021-mi julimi allaffigeqatigininnerani allagaasimasut kommunip innersuussutigimmagit, naak suliami illua'tungiusup isumaanik tusarniaalluni allakkanut ilanngussatut kakkiussamit erseraluortoq 2021-mi julimi allaffigeqatigiittoqarsimannngitsoq,
- A-p atisaqarani assiminik inummut atiatigut taaneqanngitsumut 2021-mi augustimi nassiussisimanagera kommunip innersuussutiginnimmagu, naak assimik taassuminnga nassiussineq aalajangiisuusumik pingaaruteqartillugu isiginiarsimagaluarlugu,
- najugaqartut arlallit A-p killissanik qaangiisumik allaffigisimasaatut isigalugit kommunip innersuussutiginnimmagu, taakkua kikkuussusii erseqqinnerusumik taanagit,
- A atisaqarani assimik ataasiaannarani nassiussisimasuq kommunip innersuussutiginnimmagu, naak suliami illua'tungiusup isumaanik tusarniaalluni allakkanut ilanngussatut kakkiussamit erseraluortoq A-p asseq ataasiinnaq inummut atiatigut taaneqanngitsumut nassiussimagaa aamma

- A-p allaffigeqatiginnittarnerata soq killissanik qaangiisuunera kommunip allaaseringikkaa, taamaallaalli pissutsit ataatsimut pingaarnerusutigullu allaaseralugit.

Oqaatigaara kommunip uannut oqaaseqaammini 11. august 2022-meersumi oqaatigigaa A-p allakkanik sunik nassiussisimanera aalajangiinermut ersertoq.

Uanga paasinninnera unaavoq allakkanik suussusiannik allaaserinninneq amigartuq, suummi aalajangiinermut pissusiviusutigut uppersaasersuinikkullu tungaviunera kommunip erseqqissumik innersuussutigisussaammagu.

**5.3.2.** Kommunip sulisoqarneq pillugu quppersagaq peersitsinermut inatsiseqartitsinikkut tungaviusoq peersitsisisoqarnissaanik aalajangiinermi 9. september 2021-meersuni innersuussutigaa.

Uanga naliliinera unaavoq sulisoqarneq pillugu quppersakkamut innersuussineq naammangitsoq, sulianimi peersitsinermut tunggasuni tamani pisumi oqimaalutaasoqartussaammat.

Uanga tamanna tungavigalugu naliliinera unaavoq A-p pissusilersornera atorfeqartitaanermut tunggasunik annertuumik/kusanaatsumik unioqqutitsinerunini pissutigalugu peersitsinermut tungavilersuutaasinnaassanersoq kommunip aalajangiinermi erseqqissumik pisullu ataasiakkaarlugit naliliiffigisimasariaqaraluarraa.

Uanga tamanna tungavigalugu naliliinera unaavoq kommunip peersitsisoqarnissaanik aalajangiinera 9. september 2021-meersoq suliassat suliarineqartarnerat pillugu inatsimmi aalajangiinermut piumasaqaataasunik eqqortitsisuunngitsoq, pisummi peersitsinermut aalajangiisuusumik sunniuteqartut aalajangiinermi naammattumik erseqqissarneqarsimangimmata. Taamaalilluni uanga naliliinera unaavoq aalajangiineq amigaatilimmik tungavilersorneqarsimasoq.

Kommunip aalajangiinermut tungavilersuutaa tamanna tungavigalugu ajuusaarnarluinnartutut isigaara.

## **6. Eqikkaalluni inerniineq**

Uanga naliliinera unaavoq kommunip suliami illua'tungiusup isumaanik tusarniaalluni allagai 31. august 2021-meersut suliaassat suliarineqartarnerat pillugu inatsimmi § 19-imi aamma annertusisamik tusarniaasussaataitanermi inatsisikut aalajangersagaanngitsumi suliami illua'tungiusup isumaanik tusarniaanermut piunasaqaammik eqqortitsisuunngitsut, pisummi peersitsissamaarnermut aalajangiisuusut kommunip naammattumik erseqqissarsimangimmagit. Taamaalilluni kommunip suliami illua'tungiusup isumaanik tusarniaanerata A pissusiviusutigut, inatsiseqartitsinikkut uppersaasersuinikkullu tunngaviusumik tamarniusumik paasisaqarnissaanut periarfissinngilaa.

Taamaalillunga isumaqarpunga kommunip suliami illua'tungiusup isumaanik tusarniaanera ajuusaarnartuusoq.

Uanga naliliinera aammattaaq unaavoq kommunip peersitsisoqarnissaanik aalajangiinera 9. september 2021-meersoq amigartumik tunngavilersugaasoq, aalajangiinermi suliaassat suliarineqartarnerat pillugu inatsimmi aamma suliami illua'tungiusup isumaanik tusarniaasussaataitanermi annertusisami piunasaqaataasunik eqqortitsisuunngimmat.

Taamaalillunga kommunip aalajangiinermi tunngavilersuutaa ajuusaarnarlunnartutut isigaara.

Uangali naliliinera unaavoq suliami illua'tungiusup isumaanik tusarniaanerup amigaateqarnera atuussinnaassuseqannginnermik nassataqanngitsoq, suliamimi illua'tungiusup isumaanik tusarniaanerup amigaateqarnera A-p pisunik paasinnsinnaaneranut aalajangiinermullu tunngavigineqartumut sunniuteqarsinnaaneranut aalajangiisuusumik pingaaruteqanngimmat.

Suliami annertunerusumik iliuuseqaqqissanngilanga, taamalu suliaq naammassillugu suliarineqartutut isigalugu.

Allakkat ukua assilinerat A-mut nassiuppara.

Oqaaseqaat manna oqaaseqaammi pineqartut ilisarnarunnaarsillugit nittartak-  
kanni tamanut saqqummiunneqarumaarpoq 2022-milu ukiumoortumik nalunaa-  
rutinni eqqaaneqarumaarluni.

## **SULIAP INGERLASIMANERATA ALLAASERINEQARNERA**

A e-mailikkut allakkanik kinguaassiuutitut tunngasunik imalinnik inummut atiati-  
gut taaneqanngitsumut 19. maj 2021-mi, 4. juni 2021-mi, 6. juni 2021-mi aam-  
ma 26. juni 2021-mi nassiussisarsimavoq.

A Meeqqanut Inuusuttunullu Ingerlatsivimmi suliarnik suliarinnittutut 1. juli 2021-  
mi atorfinitsinneqarpoq.

A-p e-mailikkut allakkanik kinguaassiuutitut tunngasunik imalinnik angerlarsimaf-  
fiup avataanut inissiinerup kingornatigut malitseqartitsivimmi najugaqartumut  
ataatsimut arlalinnulluunniit nassiussisimanera kommunip 30. august 2021-mi  
paasisimavaa.

A e-mailikkut allakkanik kinguaassiuutitut tunngasunik imalinnik inummut atia  
taaneqanngitsumut 17. august 2021-mi nassiussisarsimavoq.

Suliami illua'tungiusup isumaanik tusarniaat kommunip A-mut 31. august 2021-  
mi nassiuppaa, kommunillu tassani makku oqaatigai:

### **"Pillugu: Soraarsitsinissamik siunniussaqaarneq pillugu tusarniaaneq – Naa- lasseriitsuliorneq peqqutigalugu kinguneqartitsineq**

Matumuuna nalunaarfigineqarputit ataani atsiortunga illua'tungerisamik tusarniaaneq  
aallartikkakku, matumani siunniukkakku ingerlaannartumik atuutilersussamik soraar-  
sinneqarnissat, sullissititut Meeqqanut Inuusuttunullu Ingerlatsivimmi killissanik qaa-  
ngiilluni meeqqanut ulloq unnuarlu [paaqqinniffimmi] [...-mi] inissitanut allagaqartar-  
simaanerit kiisalu atisaqarnak assernik nassiussisarsimaanerit peqqutigalugu.

### **Tusarniaanermut killigititaq**

Pisortat ingerlatsineranni suliassat suliarineqartarnerat pillugu Inatsisartut inatsisaat  
naapertorlugu tusarniarneqaqqaassaait. Suliamut tunngatillugu oqaaseqaatissaqaruit  
taakku Kommuneqarfik Sermersuup tigoreersimassavai kingusinnerpaamik 6. septem-  
ber 2021 nal. 12:00. Killigititaq nallerpagu kommunilu akissutigisannik tigusaqarsi-  
mannigppat aalajangiineq pissaaq paasissutissat pigineqartut aallaavigalugit.

Ilassutissatit nassiunneqassapput ataani "attavissat" ataanni allassimasunut.

Pisup ingerlanera:

Ulloq 1. juni 2021 sullissitut Meeqqanut Ilaqutariinnullu Ingerlatsivimmi [illoqarfimmi] atorfinitsinneqarputit.

Ulloq 30. august 2021 ulloq unnuarlu inissiisarfimmiit [...-miit] Kommuneqarfik Sermersuumi qullersat attavigineqarpoq, paasitinneqarlunilu [...-mi] najugaqartut sulisunut angussisimasut killissamik qaangiillutit [...-mi] ineqartunut allaqattaarsimasutit (takuuk ilanngussaq), kiisalu aamma assernik atisaqarnak assilisanik nassittarsimagitit.

Allaqateqartarnerit aallartissimavoq juni 2021-mi kiisalu ingerlanneqarsimalluni juli 2021 ilanngullugu.

### **Inatsisitigut tunngavigineqartut**

Suliami aalajangiisoqassaaq aqutsisussaataannermut tunngavisoq naapertorlugu, tassa sulisitsisoq pisinnaatitaaffeqarmat sulinermik aqutsisinnaatitaalluni, naliliininilu malillugu sulisunik naleqquttumik atuisinnaatitaammat, Kalaallit Nunaanni Naalakkersuisut aamma Atorfillit Kattuffiata isumaqatigiissutaanni § 2 naapertorlugu.

Pisortat ingerlatsineranni suliassat sularineqartarnerat pillugu Inatsisartut inatsisaanni nr. 8-mi, 13. juni 1994-imeersumi § 19 naapertorlugu illua'tungerisatut tusarniarneqassaatit. Tamanna ima isumaqarpoq illit oqaaseqaateqarnissannut periarfissaqasasutit, kommunip suliami aalajangiinissaa sioqqullugu.

Una tusarniaaneq tunngaveqarpoq inatsisitigut aalajangersagaanngitsumik annertusamik illua'tungerisamik tusarniaasarnermik, aalajangiisoqartinnagu illua'tungerisaaq suliamut tunngatillugu paasissutissanik ilisimasaqassaaq matumanilu inatsisitigut tunngavigineqartunik kiisalu soraarsitsinissamik siunniussinermit tunngavigineqartunik aamma periarfissaqassalluni oqaaseqaateqarnissaminut.

Atorfillit pillugit inatsimmi suliunnaarsitsineq pillugu malittarisassat atuupput. Naalakkersuisut aamma Atorfillit Kattuffiata akornanni isumaqatigiissummi socialrådgiverinut § 33 innersuussivoq sulisitsisut aamma atorfillit akornanni inatsisitigut pissutsit pillugit Inatsisartut inatsisaannut nr. 11-mut, 29. november 2013-imeersumut. IMALUUNNIIT isumaqatigiissut atuuttoq naapertorlugu.



Tunngavilersuut:

Killissamik qaangiilluni (pisup ingerlanerani) nassuiaatigineqartumi iliuseqarsimaneq Kommuneqarfik Sermersuumit akuerineqarsinnaangilaq.

Naak atorfeqarnerni ilisimagaluarlugu juni 2021-mi kiisalu juli 2021-mi [...-mi] najuqaqartunut attaveqartarlutit mobilikkut iliuseqarsimagavit, taamaaliorneq killissamik meeqqanut qaangiinerusoq, kiisalu meeqqanut sullissisussaataitanermi (myndighed) sullissisarnermi tatigineqarneq avataaniillu Kommuneqarfik Sermersuup isigineqarnera innarlernaveersaartussaallugu nalunngikkaluarlugu, taamaattoq akuersaarneqarsinnaangitsumik iliuseqarsimavutit.

[...]"

Oqarasuaatip angallattakkap assilinera suliama illua'tungiusup isumaanik tusarniaalluni allakkanut ilanngussatut nassiunneqarsimavoq, tassanilu A-p inuullu atiatigut taaneqanngitsup oqaloqatigiinnerisa ilaat takuneqarsinnaalluni. A-p inuullu atiatigut taaneqanngitsup oqaloqatigiinnerannit assilisat marluk ilanngussatut aammattaq nassiunneqarsimapput.

Suliama illua'tungiusup isumaanik tusarniaalluni allakkat tiguneqarnerannut uppernarsaat A-p 31. august 2021-mi atsiorpaa, sulinermilu 31. august 2021-mit pisussaaffiagaalluni.

Kommuni 9. september 2021-mi aalajangiivoq, makkulu oqaatigalugit:

**"Pineqartoq: Ingerlaannartumik atuutilersumik soraarsinneqarninnik aalajangiineq**

Ulloq 31. august 2021 Kommuneqarfik Sermersooq suliama illua'tungerisamik ingerlaannartumik soraarsitsinissamik siunniussaqaarluni aallartitsivoq, ulloq septemberip arfernat 2021-mi kingulleq akissutissamik tunniussiffissatut aaliangerneqaarluni. Tusarniaanermi akissutissamik tigusaqarsimangilagut.

**Pissutsit piviusut suliama tunngavigineqartut:**

Ulloq 30. august 2021 ulloq unnuarlu inissiisarfimmit [...-mit] Kommuneqarfik Sermersuumi aqutsisunit attavigineqarpoq, paasitinneqarluni [...-mi] najugaqartut sulisunut anngussisimasut killissamik qaangiillutit [...-mi] ineqartunut allattaqattaarsimasutit, kiisalu aamma assernik atisaqarnak assilisanik nassittarsimagitit, allaqatigiinnermilu "kujatta" oqaaseq atorsimanera takuneqarsinnaalluni.

Allaqateqartarnerit aallartissimavoq juni 2021-mi kiisalu ingerlanneqartarsimalluni juli 2021 ilanngullugu.

### **Maleruaqqusat suliame tunngavigineqartut**

#### **Kommuneqarfik Sermersuup sulisunut mappersagaani ima allaqqasoqarpoq:**

*"Ingerlaannartumik atuutilersumik soraarsitsisoqarsinnaavoq, soorlu assersuutigalugu atorfeqartoq annertuumik unneqqarinngitsumik iliuuseqarsimaguni, pisortamut, suleqatigisamut imaluunniit sullitamut nakuusersimaguni, aningaasanik peqquserluuteqarsimaguni aamma tillissimaguni, suliassaminik suliaqarnissaminut naaggaarsimaguni imaluunniit atorfeqartitaanini annertuumik atornerlussimaguniuk."*

Meeqqanut Ilaqutariinnullu Ingerlatsivimmi atorfinnit soraarsinneqarputit, suliameullu atatillugu politiiut suliassanngortitsisoqarsimavoq. Politiinut suliassanngortitsisimamerup qanoq inerneqarumaarnissaa suli oqaatigineqarsinnaanngilaq, atorfinnilli peersitaanerit kommunip suliame ilungersunartutut isigaa atorfeqartitaaninilu pisussaaffitit annertuumik unioqqutikkittit naliliiluni. Taamaattumillu kommunip iluani suliffeqarfimmi allami atorfimmi meeqqanut sullissiviusumi sulilersinnaanerit naatsorsuutigisinaanngilat, taamaattorli kommunip iluani suliffeqarfimmi allami aqutsisup/pisortap allatut sulisorineqarsinnaanersutit kisimi aalajangiiffigisinnaavaa.

### **Tunngavilersuut**

Qulaani taakkartorneqartut tunngavigalugit Meeqqanut Ilaqutariinnullu Ingerlatsivimmi aqutsisup [...-p] matumuuna aalajangiuppaa atorfinnit ingerlaannartumik atuutilersumik peersinneqartutit, Kommuneqarfik Sermersuup nalilerlugu atorfeqarninni pisussaaffitit annertuumik unioqqutikkittit. Ingerlaannartumik atuutilersumik suliffinniit peersitaanerit isumaqarpoq atorfeqartitaanerit aningaasarsiatillu ullumikkut septem-berip 9-ni 2021-miit atuutilersumik unitsinneqarmata.

[...]"

Aalajangiinerup tiguneqarneranut uppersaat A-p 9. september 2021-mi atsiorpaa.

A-p allagaatit arlallit uannut 12. januar 2022-mi nassiuppai. A-p oqarasuaatikkut 18. januar 2022-mi oqaloqatigineqarnermini sulisuma ilaannut oqaatigaa Kommuneqarfik Sermersuumi Meeqqanik Ilaqutariinnillu Ingerlatsivimmi atorfinnit peersinneqarnissaminik kommunip aalajangiinera 9. september 2021-meersoq naammagittaalliuutiginiarini.

A-p sulisuma ilaannut oqaatigaa piffissami peersitsinerup pinerata nalaaniittumi suliamut atatillugu peqatigiiffimmut ilaasortaanani.

Kommuni 21. januar 2022-mi qinnuigaara suliami A-p peersinneqarneranut tunngasumi allagaatit tamaasa nassiuteqqullugit. Suliami allagaatit 24. januar 2022-mi aamma 1. februar 2022-mi tiguakka.

Kommuni 4. marts 2022-mi qinnuigaara suliaq pillugu oqaaseqaateqaqqullugu, ilaatigullu makku oqaatigalugit:

“[...]”

Pissutsit arlallit suliami allagaatit tunngavigalugit paasiuminaatsippakka, taamaattumillu kommuni qinnuigaara suliaq pillugu oqaaseqaateqaqqullugu.

Oqaatigaara malugigiga A suliami illua'tungiusup isumaanik tusarniaanerup tigonera uppersaarlugu atsiorsimasoq, uangalu paasinninnera unaasoq A-p suliami illua'tungiusup isumaanik tusarniaanermut akissummik tunniussinissaminut periarfissani atorsimangikkaa.

Kommuni qinnuigaara pissutsit makku, ajornangippat tulleriinnilerneqarneri malillugit, isummerfigeqqullugit:

**1.** Suliami illua'tungiusup isumaanik tusarniaaneq eqqarsaatigalugu oqaaseqaatinni 2021-2-mi, nittartakkanni atuarneqarsinnaasumi, suliami illua'tungiusup isumaanik

tusarniaanermi piumasaaqatinik allaaserinninnera innersuussutigaara, tassanilu ilaatigut makku oqaatigaakka:

“Pisortat ingerlatsineranni suliassat suliarineqartarnerat pillugu Inatsisartut inatsisaanni nr. 8-mi, 13. juni 1994-imeersumi kingusinnerusukkut allannguuteqartinneqartumi (matuma kingornatigut suliassat suliarineqartarnerat pillugu inatsimmik taaneqartartussami) § 19-ikkut aalajangersarneqarpoq oqartussaasoq, suliami aalajangiinnginnermini, suliami illua’tungiusup isumaanik tusarniaanissamut pissaaffeqartoq. Suliami illua’tungiusup isumaanik inatsisikkut aalajangersagaasumik tusarniaasussaataaneq oqartussaasup nammineq sulisui eqqarsaatigalugit atorfinitsitsisarneq pillugu inatsiseqartitsineq tungavigalugu iliuitsinut aalajangersimasunut aamma atuuppoq. Peersitsineq suliassat suliarineqartarnerat pillugu inatsimmi aalajangiinermik oqartarnertut aalajangiineruvoq, taamaattumillu suliami illua’tungiusup isumaanik tusarniaasarneq pillugu malittarisassat suliamut taamaattumut aamma atuupput.

Suliami illua’tungiusup aalajangiissamaarnermut pissaaviviusutigut tunngaviviusunik ilisimasaqalernissaminut taakkulu pillugit oqaaseqaateqarnissaminut oqartussaasup aalajangiinnginnerani periarfissinneqarnissaa suliami illua’tungiusup isumaanik tusarniaanerup siunertaraa.

Suliami illua’tungiusup isumaanik tusarniaasussaataaneq suliassat suliarineqartarnerat pillugu inatsimmi § 19, imm. 1 tunngavigalugu atuuttarpoq oqartussaasup suliami pissaaviviusut pillugit paasissutissanik aalajangersimasunik pigisaqarnera suliami illua’tungiusup ilisimangippagu, paasissutissat taakku suliami illua’tungiusumut akornusiisuuppata – oqartussaasullu paasissutissanik pineqartunik pigisaqarnera suliami illua’tungiusup ilisimassagaa ilimagineqarsinnaangippat.

Atorfinitsitsisarneq pillugu inatsiseqartitsineranni iliuitsinut aalajangersimasunut, matumani peersitsisoqarnissaanik aalajangiineq ilanngullugu eqqarsaatigalugu, atatillugu suliassat suliarineqartarnerat pillugu inatsimmi § 19-imi suliami illua’tungiusup isumaanik tusarniaasarneq pillugu ataatsimut malittarisassaq suliami illua’tungiusup isumaanik annertusisamik tusarniaasarneq pillugu malittarisassamik inatsisikkut aalajangersagaanngitsumik tapertalerneqartarpoq – tassuunalu aalajangersarneqarpoq suliami illua’tungiusoq - suliami pissaaviviusut pillugit tusarniaanerup saniatigut – suliap inatsiseqartitsinikkut uppernarsaasiussatigullu tunngavii pillugit aamma tusarniaavigneqassasoq. Suliami illua’tungiusoq aalajangiinermut

tunngaviusut tamarmiusut pillugit isummaminik tusarniaavigineqassaaq, paasissutissat pineqartut oqartussaasup pigigai paasissutissallu pineqartut oqartussaasup aalajangiinissaanut tunngaviusunut ilaasut suliami illua'tungiusup nalunngereeraluarpaguluunniit.

Taamaattumik oqartussaasup pineqaatissiissutiginiakkatut eqqarsaatigineqartumut tunngaviusoq pillugu suliami illua'tungiusup isumaanik tusarniaalluni atorfeqartitaasumut allakkat makkuninnga imaqartut suliarissavai:

- Pissutsit oqartussaasup pingaartillugit isiginiagai,
- Oqartussaasup suliamik paasinninnerigallagaa,
- Uppernarsaatitigut naliliisoqarsimappat naliliinerit,
- Oqartussaasup suliami inatsiseqartitsinikkut apeqqutit pillugit isumaa, matumani inatsisini malittarisassat suut atussamaarneqarnerat taakkualu suliamut pineqartumut qanoq attuumassuteqarneri ilanngullugit eqqarsaatigalugit.

Suliami illua'tungiusup isumaanik tusarniaanermut tunngaviup eqqortuunera oqartussaasup qulakkiissallugu pisussaaffigaa.

Oluf Emborgip aamma Peer Schaumburg-Müllerip atuakkiaanni "Offentlig arbejdsret"-imi aappasaanik naqitertinneqartumi (2010-meersumi) quppernerit 51-52 aamma Niels Fengerip atuakkiaanni "Forvaltningsret"-imi siullermeertumik naqitertinneqartumi (2018-imeersumi) quppernerit 590-592 innersuussutigaa.

Tamatununga atatillugu oqaatigaara suliami illua'tungiusup isumaanik tusarniaanerup siunertaa tassaasoq suliami illua'tungiusutut isummaminik tusarniaavigineqartup iliutsimi peersitsinissamillu aalajangiinerup imminnut ataqatigiinneqarnerannik paasinninnissaminut periarfissinneqarnissaa taamalu suliaq pillugu tamakkiisumik paasiqarnissaa.

Aamma oqaatigaara oqartussaasup suliami illua'tungiusup isumaanik tusarniaalluni allagaasa peersitsinissamillu aalajangiinerata peersitsinermut tunngaviusoq sukumii-sumik nassuiassagaat. Tamanna aamma atuuppoq peersitsinermut tunngaviusoq sulisitsisup oqaasiinnartigut suliamiluunniit illua'tungiusup isumaanik tusarniaanermut ilaatillugu nassuiareersimagaluarpaguluunniit.

Kommuni tamanna tunngavigalugu qinnuigaara suliap ingerlasimaneranik suliame illua'tungiusup isumaanik tusarniaalluni allakkani 31. august 2021-meersuni aamma aalajangiinermi 9. september 2021-meersumi allaaserinninnerup A aalajangiinermut pissusiviusunik, uppersaatinik inatsiseqartitsinermilu tunngaviusunik tamarmiusunik paasisaqarnissaanut periarfissikkaa kommuni isumaqarnerseq oqaaseqaammi nas-suaqqullugu.

Tamatumunnga atatillugu oqaatigaara uanga paasinninnera unaasoq sulisup peersinneqartup kina innarlerneqarsimasoq, taanna taakkuluunniit qanoq iliornikkut innarlerneqarsimasut kiisalu innarliineq innarliinerilluunniit qanga pisimanerat suliame illua'tungiusup isumaanik tusarniaalluni allakkat aalajangiinerlu tunngavigalugit ilisima-sussaagai.

**2.** Sulisitsisup sulisumik akisussaaffimminik kusanaatsuliorluni annertuumillu sumiginnaasumik peersitsinissaminut periarfissaqarnera aqutsisinnaatitaanerup nassata-  
raa.

Tamatumunnga atatillugu oqaatigaara kommunip A-mik peersitsisoqarnissaanik aalajangiinermi 9. september 2021-meersumi sulisoqarneq pillugu mappersagaq issuaavigigaa, tassanngalu ersertoq sulisoq suliffimmit peersinneqarsinnaasoq, pineqartup pissutsit atorfeqartitaanerminut tunngasut annertuumik unioqqutippagit.

Kommunip suliame illua'tungiusup isumaanik tusarniaalluni allakkani 31. august 2021-meersuni ilaatigut makku oqaatigai:

"[...] matumani siunniukkakku [...] soraarsinneqarnissat, sullissisutut Meeqqanut Ilaqutariinnullu ingerlatsivimmi, killissamik qaangiilluni meeqqanut ulloq unnuarlul [paaqqinniffimmi] [...-mi] inissitanut allaqateqartarsimanerit kiisalu atisaqarnak assernik nassiussisarsimanerit pissutigalugu.

[...]

Naak atorfeqarnerni ilisimaarigaluarlugu, juni 2021, kiisalu juli 2021-mi [...-mi] najugaqartunut attaveqarlutit mobilikkut iliuuseqarsimagavit, taamaaliorneq killissamik meeqqanut qaangiinerusooq, kiisalu meeqqanut sullissisussaataitanermi, (myndighed) sullissisarnermi tatigineqarneq avataaniillu Kommuneqarfik Sermer-

suup isigineqarnera innarlernaveersartussaallugit nalunngikkaluarlugu, taamaat-toq akuersaarneqarsinnaanngitsumik iliuuseqarsimavutit.”

Aalajangiinermi 9. september 2021-meersumi kommunip ilaatigut makku oqaatigai:

“[...] [...-mi] najugartut sulisunut anngussisimasut killissamik qaangiillutit, [...-mi] ineqartunut allaqattaarsimasutit, kiisalu aamma assernik atisaqarnak assilisanik nassittarsimagitit, allaqatigiinnermilu “kujatta” oqaaseq atorsimanera takuneqarsinnaalluni.

[...]

[...] atorfinnilli peersitaanerit kommunip suliatut ilungersunartutut isigaa, atorfeqartitaaninnilu pisussaaffiit annertuumik unioqutikkittit naliliilluni.

[...] Kommuneqarfik Sermersuup nalilerlugu atorfeqartitaaninni pisussaaffiit annertuumik unioqutikkittit. [...]”

Kommuni tamanna tunngavigalugu qinnuigaara kusanaatsumik annertuumillu unioqutitsisoqarsimanissaanik piunasaqaat piffissami peersitsiviusumi eqqortinneqarsimasoq kiisalu tamanna [A-p] suliami illua'tungiusup isumaanik tusarniaalluni allakkat aallaavigalugit erseqqilluinnartumik paasisimagaa kommuni isumaqarnersoq oqaaseqaammi nassuiaqqullugu.

**3.** Kommuni aamma qinnuigaara suliami pisumut naapertuuttumik iliuuseqarnissamik oqimaalutaasimanini oqaaseqaammi nassuiaqqullugu, matumanilu pineqaatissiinerit akuliuffiunnginnerusut atorneqarnissaat isumaliutersuutigineqarsimanersoq kiisalu atorfinitsitsisarneq pillugu inatsiseqartitsineri qisuariaat alla pinnagu peersitsisoqarnissaa soq toqqarneqarsimanersoq ilanngullugit paasissutissiissutigalugu.

**4.** [A-p] sulisuma ilaannik oqarasuaatikkut 5. januar 2022-mi oqaloqateqarnermini oqaatigaa [illoqarfimmi] Meeqqanik Ilaqtariinnillu Ingerlatsivimmi sulianik suliarinnittutut 1. juli 2021-miilli atorfeqartitaasimalluni.

Kommunimi sulisut e-mailikkut 30. august 2021-mi allaffigeqatigiinnerannit erserpoq [A] 1. juli 2021-mi atorfinitsinneqarsimasoq, qaammatini pingasuni misilinneqassalluni.

Suliami illua'tungiusup isumaanik tusarniaalluni allakkani 31. august 2021-meersuni oqaatigineqarpoq [A] 1. juni 2021-mi atorfinitsinneqarsimasoq.

Kommuni tamanna tunngavigalugu qinnuigaara [A] Meeqqanik Ilaqutariinnillu Ingerlatsivimmi sulianik suliarinnittutut qanga atorfinitsinneqarsimanersoq oqaaseqaammi paasissutissiissutigeqqullugu.

**5.** Suliami illua'tungiusup isumaanik tusarniaalluni allakkani 31. august 2021-meersuni kiisalu peersitsisoqarnissaanik aalajangiinermi 9. september 2021-meersumi oqaatigineqarpoq allaffigeqatiginnittarneq suliami pineqartoq 2021-mi junimi aallartissimasoq 2021-milu juli ilanngullugu ingerlasimasoq.

[A] 1. juli 2021-miit atorfeqartitaasimappat kommuni qinnuigaara pissutsit atorfinitsit-sineq sioqqullugu pisimasut peersitsinermut qanoq ilillutik tunngaviutinneqarsinnaanersut nassuiaqqullugu.

**6.** Suliami allagaatinit kommunip uannut nassiussaanit erserpoq 19. maj 2021-mit 17. august 2021 ilanngullugu sms-ikkut allagaasarsimasut kommunip tigummigai. Uanga paasinninnera unaavoq sms-ikkut allagaasarsimasut taakku suliami illua'tungiusup isumaanik tusarniaatitut allakkanut 31. august 2021-meersunut ilanngussatut ilanngullugit nassiunneqarsimasut.

Allagaasarsimasunit taakkunannga erserpoq [A-p] assi "kujatta"-mik oqaasertalerlugu 17. august 2021-mi nassiussimagaa.

Qulaani erseqqissarneqartutut kommunip oqaatigaa allaqatigiittarneq taanna 2021-mi junimi aallartissimasoq, 2021-milu juli ilanngullugu ingerlasimasoq.

Kommuni qinnuigaara killissamik qaangiilluni iliuuseqarneq junimit juli ilanngullugu ingerlasimasoq oqaatigiitigalugu assi 17. august 2021-mi nassiunneqarsimasoq peersitsinermut tunngavittut pingaartillugu qanoq iliorluni isiginiarneqarsinnaanersoq oqaaseqaammi nassuiaqqullugu.

**7.** Kommuni taamatuttaaq qinnuigaara allaffigeqatigiittarneq suna 2021-mi julimit ingerlasimasoq innersuussutigineqarnersoq oqaaseqaammi nassuiaqqullugu, allagaa-



timmi kommunip uannut nassiussimasai tunngavigalugit takusinnaagakku [A] 26. juni 2021-mit 17. august 2021-mut sms-ikkut nassiussaqaarsimangitsoq.

**8.** Kommunip allagaasigut 31. august 2021-meersutigut aamma 9. september 2021-meersutigut oqaatigineqarpoq [A] [...-mi] najugaqartunut killissanik qaangiisumik pissusilersorsimasoq.

Suliami allagaatini kommunip uannut nassiussaani taamaallaat sms-ikkut nassiussaqa ataaseq ilaavoq.

Kommuni tamanna tunngavigalugu qinnuigaara najugaqartut allat kikkut innersuussutigineqarnerisut kiisalu [A] taakkuninnga allaffigeqatiginnittarsimappat tamatumunnga uppersaatinik piisoqarnerisooq nassuiaqqullugu.

**9.** Kommunip suliami illua'tungiusup isumaanik tusarniaalluni allakkani 31. august 2021-meersuni oqaatigaa [A-p] mobilikkut attaveqarfiginninnera "*killissanik meeqqanut qaangiinerusoq*".

Kommuni qinnuigaara meeqqat kikkut kommunip innersuussutiginerai oqaaseqaammimi nassuiaqqullugu.

Tamatumunnga atatillugu oqaatigaara kommunip iluani e-mailimi 30. august 2021-meersumi takuneqarsinnaasoq pineqartoq eqqunngitsuliorfigineqartoq aqqatigut taasaq 18-it sinnerlugit ukioqartoq, taamaattumillu meeraangitsoq.

**10.** Kommunip aalajangiinermi 9. september 2021-meersumi oqaatigaa peersitsinermut atatillugu suliaq politiinut tunniunneqarsimasoq.

Kommunimi sulisup sulisumut allamut e-mailiani 30. august 2021-meersumi oqaatigineqarpoq pineqartup eqqunngitsuliorfigineqartup [A] [illoqarfimmi] politiinut nalunaa-rutigisimagaa, [illoqarfimmilu] politiit attaveqarfigisimallugit. Kommuni allassimavoq suliaq politiit ingerlateqqissamaangikkaat, eqqunngitsuliorfigineqartummi tamarmik 18-it sinnerlugit ukioqarmata.

Kommuni tamanna tunngavigalugu qinnuigaara peersitsinermut atatillugu suliaq politiinut suliasangortinneqarsimasoq aalajangiinermi 9. august 2021-meersumi soq innersuussutigisimanerlugu oqaaseqaammimi nassuiaqqullugu.

**11.** Suliami allagaatit tunngavigalugit uanga paasinninnera unaavoq kommunip [A] kannguttaatsuliorsimasutut nalunaarutigisimagaa.

Politiinut suliasannngortitsineq taanna [A-p] peersinneqarnissaanik kommunip aalajangiineranut 9. september 2021-meersumut kiisalu kannguttaatsuliorsimaneq [A-p] ulloq unnuarlu paaqqinniffimmi [...-mi] najugaqartumut najugaqartunulluunniit arlalinnut allaffigeqatiginnittarsimanageranut sutigut attuumassuteqarnerseq paasiuminaatsippara.

Kommuni qinnuigaara tamanna pillugu nassuiaateqaqqullugu.

[...]"

Kommunip oqaaseqaataa 14. marts 2022-mi tiguara, kommunillu tassani makku oqaatigai:

**"Suliaq [A-mut] tunngasoq pillugu nassuiaat**

Suliaq qulaani taaneqartoq pillugu nassuiaateqaqqusivutit.

Suliaq pillugu imaattunik oqaaseqaatissaqarpunga:

[A] Meeqqanit Ilaqtariinnillu Ingerlatsivimmi [illoqarfimmiittumi] sulianik suliarinnittutut 1. juli 2021-mi atorfinitsinneqarpoq.

**1 pillugu:**

[A-p] pisortarisaata suliami illua'tungiusup isumaanik tusarniaalluni allakkat ilanngusallu [A-mut] 31. august 2021-mi nassiuppai. Uanga paasinninnera unaavoq malit-tarisassat atuuttut tunngavigalugit paasitinneqarsimasoq, tassami nammineq atsior-simammat allagaatillu tamaasa tigusimallugit.

Tassani suliami illua'tungiusup isumaanik tusarniaanermut akissuteqarnissamut piffis-saliisoqarsimavoq, pineqartulli periarfissaq taanna atorsimangilaa.

Aalajangiineq K.S.-ip pineqartumut 9. september 2021-mi nassiuppaa, pineqartullu tigusaqarnini uppersarlugu aamma atsiorsimalluni.

Tassani pineqarteq sivikippallaamik piffissalernerqarsimanersaq taamaannginnorsorluunniit K.S.-ip isummerfigisinnaanngilaa, pineqartormi suliap ingerlanerani tamarmi tutsaqarsimanngilluinnarmat (tassa suliami illua'tungiusup isumaanik tusarniaanermiit aalajangiinerup tungaanut).

## **2 pillugu**

Kommuneqarfik Sermersuumi Sulisoqarnermut Immikkoortortaqarfik HR Meeqqanut Ilaqutariinnullu Ingerlatsiviup ([...-p]) pisortaanit paasitineqarpoq [illoqarfimmi] isumagininnermut immikkoortortaqarfiup pisortaa [...-p] (meeqqanik inuusuttunillu ulloq unnuarlu paaqqinniffiup) Kalaallit Nunaanni kommunini isumagininnermut immikkortortaqarfiit meeqqanik inuusuttunillu inissiivigisartagaasa pisortaanit attaveqarfigineqarsimasoq.

[Ulloq unnuarlu paaqqinniffiup] pisortaata oqaatigaa niviarsiaqqat marluk [...-mi] najugaqartut suliamik suliarinnittup ([A-p]) [illoqarfimmi] atorfeqartitaasup killissamik qaangiilluni kannguttaasuliorlunilu saaffiginnissutigisartagai unitsinniarlugit ikioqqusimasut.

Pisortap oqaatigaa [A] kinguaassiuutini assileriarlugu assinik nassiussisarsimasoq, niviarsiaqqallu taakku marluk atoqatigiumallugit (kujatta-mik) allattalersimasoq.

Kommunip tamanna tunngavigalugu paasinninnera unaavoq iliuseq taanna peersitsinissaq pillugu suliamik aallartitsinissamut tunngavissaliisoq.

Tamanna suliami illua'tungiusup isumaanik tusarniaanermi [A-mut] 31. august 2021-mi nassiunneqartumi quppernermi 1-imi immikkoortup kingulliup siuliani paasissutissiissutigineqarpoq.

## **3 pillugu**

Kommunip paasinninnera unaavoq pineqaatissiissut taanna iliuserineqartumut naapertuuttusoq, tassami iliutsip suliffimmut kiisalu atuisunut/sullitanut (ilaatigut niviarsiaqqanut inuusuttuaqqanut taaneqartunut) attuumassuteqartumik pisimanera isiginiarneqarmat.

Isumagininnermi immikkoortortaqarfiup saaffiginnissutaa tiguneqarmat [A-p] immikkoortortaqarfimmit peersinneqarnissaa kissaatigineqarsimavoq. Meeqqanik taakkunin-

nga [illoqarfimmi] isumaginninnermi immikkoortortaqarfimmit inissinneqarsimasunik (taamaattuninguna [ulloq unnuarlu paaqqinniffik] ikioqqulluni isumaginninnermi immikkoortortaqarfiup pisortaanut saaffiginnissimasoq) sullissineq pineqarmat meeqqat toqqissisimanissaat pingaarnerutinneqarpoq, pineqartullu iliuutsumik ingerlatseqqinissaa annilaanngatigiinnarumanagu [ulloq unnuarlu paaqqinniffiup] pisortaata [A] politii nut 30. augustimi suliassanngortissimavaa.

Suliami illua'tungiusup isumaanik tusarniaanermi ilaatigut oqaaseq (sulisunut mapper-sakkamisut) una atorineqarpoq:

**“Ingerlaannartumik atuutilersumik soraarsitsineq.** Ingerlaannartumik atuutilersumik soraarsitsisoqarsinnaavoq atorfeqartup atorfeqarnermini pisussaaffigisani annertuumik unioqqutippagit.

Atorfeqartuq suliffimminit ingerlaannartumik atuutilersumik soraarsinneqarsinnaavoq, soorlu assersuutigalugu atorfeqartuq annertuumik unneqqarinngitsumik iliuuseqarsimappat, pisortamut, suleqatigisamut imaluunniit sullitamut nakuusersimaguni, aningaasanik peqquserluuteqarsimaguni aamma tillissimaguni, suliassaminik suliaqarnissaminut naaggaarsimaguni imaluunniit atorfeqartitaanini annertuumik atornerlussimaguniuk.”

“Atorfeqartitaanini annertuumik atornerlussimaguniuk”-mik oqarneq tassarpiaavoq meeqqanik inuusuttunillu illersuilluni suliassamik sumiginnaaneq, isumaginninnermi immikkoortortaqarfimmit annertuumik atornerluinertut isigineqartuq.

#### **4 pillugu**

Ulloq atorfinitsitsiviusoq eqqortoq tassaavoq 1. juli 2021.

#### **5 pillugu**

Ilanngussanit ersertutut pineqartup allaffiginnittarnini majimi (atorfinitsinneqarnissani sioqqullugu) aallartissimavaa, 2021-milu junimi aamma augustimi nangittarsimallugu. Allannerminilu tamani nalunngilluinnarsimavaa oqaatigisani, apeqqutigisani kaammattuutigisani lu tamarmik atoqatigiinnermut tunngasuusut. Niviarsiaqqanik (angerlarsimaffimmik avataanut inissinneqarsimasunik) atoqatigiinnermut tunngasutigut pinerliinarneq oqarasuaatikkut ingerlanneqartuq, namminerlu 29-nik ukioqarluni.

#### **6 pillugu**

Kommuneqarfik Sermersuup pineqartumik 2021-mi junip naanerani atorfinitsitsinermini pineqartup atorfinitsinneqarnissani sioqqulluguli niviarsiaqqanut allattalereersimanera ilisimasimanngilaa, tamannalu aatsaat paasillugu augustip naajartulernerani, 21. augustimi, pineqartup atisaqarnani assinginik atoqatiginnikkumasumillu allattarnera unitsinniarlugu ikioqqullutik qinnuiginnimmata. Tassa imaappoq ulloq akuerineqarsinnaanngitsumik pissusilersornerup aallartiffia kommunip taasariaqarsimagaa, pisup ingerlasimanera erseqqissumik takutissinnaajumallugu.

### **7 pillugu**

Pineqartup atisaqarani assini pisortap oqarneratut siullermik 17. augustimi nassiussimavaa, tamannalu ilanngussani suliama illua'tungiusup isumaanik tusarniaalluni allakkanut ilanngullugit nassiunneqartuni takuneqarsinnaavoq.

### **8 pillugu**

Kommunip atit erseqqissarsinnaanngilai, paasissutissarmi taanna [ulloq unnuarlu paaqqinniffimmi] pisortap oqaasiinnartigut saaffiginnissutaatigut pissarsiarineqarsimammatt, tak. [...-p] e-mailia 30. august 2021 nal. 10.17 nassiunneqarsimasoq "Kikkut Saaffigissavagut?"-mik qulequtaqartoq.

### **9 pillugu**

[...-p] saniatigut meeqqat allat kikkussusii kommunip naluai.

### **10 pillugu**

[Ulloq unnuarlu paaqqinniffiup] pisortaata nalunaarutiginninnerata tiguneqarneranut uppenarsaat Kommuneqarfik Sermersuup piginnigilaa, taamatuttaarlu isumaginninnermi immikkoortortaqaqfiup pisortaa tamatuminnaga politiinut suliassanngortitsisimansoq HR-ip uppenarsarsinnaanagu.

### **11 pillugu**

Politiinut 9. september 2021-mi suliassanngortitsineq uppenarsarneqarsimansoq Kommuneqarfik Sermersuup qulakkeersimanngilaa, ilimagaluguli suliaq [ulloq unnuarlu paaqqinniffiup] pisortaanit politiinut suliassanngortinneqarsimasoq, kiisalu pineqartup sullitaminut sms-ikkut (ilanngussami takutinneqartukkut) attaveqarfiginnissimanageranik paasisaqarsimaneq aallaavigalugu kommuni naliliivoq pineqartoq atorfigisami niiginnarnissaminut naleqqukkunnaartoq tatiginnikkippullu." (Ombudsmandeqarfimmi nutsigaavoq)

Kommuni 4. april 2022-mi qinnuigaara ilassutaasumik oqaaseqaateqaqqullugu, makkulu ilaatigut oqaatigalugit:

“[...]”

Suliami allagaatit kommunip uannut allakkatigut 14. marts 2022-meersutigut nassius-sai massakkut misissoreerpakka.

Malugaara pissutsit arlallit nassuiaateqarfigeqqullugit kommunimut allakkanni 4. marts 2021-meersuni qinnutigisakka kommunip oqaaseqaammi 14. marts 2022-meersumi naammattumik nassuiarsimangikkai.

Taamaattumik kommuni qinnuigaara suliaq pillugu ilassutaasumik oqaaseqaateqaqqullugu.

1. Kommuni allakkani 4. marts 2022-meersuni immikkoortumi 1-imi qinnuigaara suliap ingerlasimaneramik suliami illua'tungiusup isumaanik tusarniaalluni allakkani 31. august 2021-meersuni aamma aalajangiinermi 9. september 2021-meersumi allaaserininnerup [A] aalajangiinermi pissusiviusunik, uppernarsaatini inatsiseqartitsinermilu tunngaviusumik tamarmiusumik paasisaqarnissaanut periarfissikkaa kommuni isumaqarnerisooq nassuiaqqullugu, tassanilu suliami illua'tungiusup isumaanik tusarniaalluni allakkat pillugit piumasaqaatit nassuiarpakka.

Kommunip akissutaani immikkoortoq 1 tunngavigalugu uanga paasinninnera unaavoq kommuni isumaqartoq suliami illua'tungiusup isumaanik tusarniaaneq malittarisassat atuuttut malillugit ingerlasimasooq, tassami [A] uppernarsaatit tamaasa tigusimallugit uppernarsaalluni atsiorsimammat.

[A-p] suliami illua'tungiusup isumaanik tusarniaalluni allakkat tigusimallugit uppernarsaalluni atsiorsimanera kommunip malittarisassanik allakkanni 4. marts 2021-meersuni allaaserisannik eqqortitsisimaneramik ilimaginninnissamut tunngavissatut naammattutut isiginngilara.

Tamatumunnga atatillugu oqaatigaara kommuni ingerlatsinermik inatsiseqartitsinermi oqartussaasup paasissutissanik aalajangiinissaminut pisariaqartunik pissarsinermigut aalajangiinissamut naammattunik tunngavissaqartussaanageranik aallaavik tunngavigalugu tassaasooq suliasat suliarineqartarnerat pillugu inatsimmi malittarisassat aamma

inatsiseqartitsinikkut tunngaviit inatsisikkut aalajangersagaanngitsut malinneqarne-  
rannik qulakkeerinninnissamut akisussaasuusooq.

Taamaattumik kommuni qinnuigeqqippara manna pillugu nassuiaateqaqqullugu, tas-  
salu suliap ingerlasimaneranik suliami illua'tungiusup isumaanik tusarniaalluni allakka-  
ni 31. agust 2021-meersuni aamma aalajangiinermi 9. september 2021-meersumi al-  
laaserinninnerup [A] aalajangiinermi pissusiviusunik, uppersaatini inatsiseqartitsi-  
nermilu tunngaviusumik tamarmiusumik paasisaqarnissaanut periarfissikkaa kommuni  
isumaqarnersoq.

2. Kommuni allakkani 4. marts 2022-meersuni imm. 2-mi qinnuigaara kusanaatsumik  
annertuumillu unioqqutitsisoqarsimanissaanik piumasaqaat piffissami peersitsiviusu-  
mi eqqortinneqarsimasooq kiisalu tamanna [A-p] suliami illua'tungiusup isumaanik tu-  
sarniaalluni allakkat aallaavigalugit erseqqilluinnartumik paasisimagaa kommuni isu-  
maqarnersoq nassuiaqqullugu.

Pisimasut qanorpiaq ingerlasimanerat kommunip oqaaseqaammimi 14. marts 2022-  
meersumi immikkooortuni 2-mi 3-milu nassuiarpaa, tassanilu ilaatigut sulisoqarneq  
pillugu politikkimi immikkoortoq issuarlugu.

Tamatununga atatillugu oqaatigaara peersitsinermut pissutaasut kommunip suliso-  
qarneq pillugu politikkiani tulleriarlugit taagorneqarsimagaluartut tunngavippiaasooq  
eqqarsaatigalugu suliat ataasiakkaarlugit pisumi naliliisoqartartussaasooq.

Aamma oqaatigaara kommunip oqaaseqaammi 14. marts 2022-meersumi immikkoo-  
rtuni 3-mi oqaatigigaa pisoq kusanaatsumik unioqqutitsinertut isigineqartoq. Pisorli  
tunngaviusooq kusanaatsutut soooq isigineqarnersoq pisorlu annertuujunersooq kommu-  
nip erseqqissumik allaaserisimanngikkaa takusinnaavara.

Taamaattumik kommuni qinnuigeqqippara tamanna pillugu nassuiaateqaqqullugu.

[...]"

Oqaatigaara ilassutaasumik oqaaseqaateqaqqusina 4. april 2022-meersooq tek-  
nikkikkut ajornartorsiuteqarneq pissutigalugu kommunimut apuutinnngitsoorsi-  
masooq. E-mailera 4. april 2022-meersooq kommunimut 20. april 2022-mi, 6. maj

2022-mi aamma 12. maj 2022-mi nassiuteqqippara. Uanga paasisara unaavoq kommunip allakkat 12. maj 2022-meersut kisiisa tigusimagai.

Kommunip ilassutaasumik oqaaseqaataa 15. juni 2022-mi tiguara.

Kommunip ilassutaasumik oqaaseqaataa kommunimut utertillugu 30. juni 2022-mi nassiuppara, kommunilu qinnuigalugu allakkannut 4. april 2022-meersunut akissutitut nutaamik oqaaseqaateqaqqullugu.

Kommuni akissuteqaqqullugu 29. juli 2022-mi nukingisaarpara, tassami allakkakka 4. april 2022-meersut tunngavigalugit ilassutitut oqaaseqaammik sulitigu saqannginnama.

Kommunip ilassutaasumik oqaaseqaataa 11. august 2022-mi tiguara, kommunillu makku oqaatigai:

**“Pineqartoq: [A-p] Kommuneqarfik Sermersooq pillugu naammagittaalliuta**

Kommunip apeqqutit Ombudsmandip allakkani 4. april 2022-meersuni 2022-324-0001-12-imik normoqartuni apeqqutigisai akeqqissagai Ombudsmandip allakkani 30. juni 2022-meersuni 2022-324-0001-19-imik normoqartuni qinnutigaa. Kommuni qinnuigineqarpoq suliaq pillugu ilassutaasumik oqaaseqaateqaqqullugu.

Allakani 4. april 2022-meersuni Ombudsmandip allagaani 4. marts 2022-meersuni 2022-324-0001-8-mik normoqartuni immikkortoq 1 innersuussutigineqarpoq, tassani ilu Ombudsmandi ilaatigut imatut allappoq:

“Kommuni tamanna tunngavigalugu qinnuigaara suliap ingerlasimaneranik suliami illua’tungiusup isumaanik tusarniaalluni allakkani 31. august 2021-meersuni aamma aalajangiinermi 9. september 2021-meersumi allaaserinninnerup A aalajangiinermut pissusiviusunik, uppersaatit inatsiseqartitsinermilu tunngaviummik tamarmiusunik paasisaqarnissaanut periarfissikkaa kommuni isumaqarneris oqaaseqaammi nassuiaqqullugu. Tamatumunnga atatillugu oqaatigaara uanga paasinninnera unaasoq sulisup peersinneqartup kina innarlerneqarsimasoq, taanna taakkuluunniit qanoq iliornikkut innarlerneqarsimasut kiisalu innarliineq innarliine-



rilluunniit qanga pisimanerat suliame illua'tungiusup isumaanik tusarniaalluni allakkat aalajangiinerlu tunngavigalugit ilisimasussaagai."

### **Kommunip akissutaa:**

Suliame illua'tungiusup isumaanik tusarniaalluni allakkanit 31. august 2021-meersunit erserpoq ulloq unnuarlu paaqqinniffimmi [...-mi] inissinneqarsimasoq suliamek suliarinnittumit suliame illua'tungiusutut isummaminik tusarniaavigineqartumit innimiillisaarfigisineqarsimasoq. Innimiillisaarfiginninnerup qangarpiaq pisimamera ilanngussani suliame illua'tungiusup isumaanik tusarniaalluni allakkanut ilanngullugit nassiunneqartuni takuneqarsinnaavoq. Taamaalilluni tunngavippiaasoq uppenarsaasersuinik-kullu tunngaviusoq suliame illua'tungiusup isumaanik tusarniaanermi ilanngunneqarsimapput. Suliame illua'tungiusup isumaanik tusarniaanermi inatsiseqartitsinikkut tunngavigisaq aqutsisinnaatitaanermut innersuussutitut aamma iliuutsit innarliisut tatinginninnermik tusaamaneqarnermillu ajoqusiineranik tikkuaanikkut ilanngunneqarsimavoq.

Aalajangiinermit 9. september 2021-meersunit erserpoq nassiussat suut [ulloq unnuarlu paaqqiffimmi] innarliisuusimasut piffissami 2021-mi junimi julimilu pisimasut. Uppenarsaasiussanit suliame illua'tungiusup isumaanik tusarniaanermut ilanngullugit nassiunneqartunit erserpoq nassiussat innarliisut aamma 2021-mi augustimi nassiunneqarsimasut. Taamaalillutik pissusiviusut uppenarsaasiussallu aalajangiinerme aamma ilanngunneqarsimapput.

Aalajangiinermit 9. september 2021-meersunit inatsiseqartitsinikkut tunngavigisaq kommunip sulisoqarneq pillugu mappersagaanik issuakkamit erserpoq, tassani atorfeqartitaasup atorfeqartitaanermi pisussaaffimminik annertuumik unioqutitsinera innersuussutigineqarpoq, mappersakkamilu taaneqartut tassaallutik sullitamut kusaanaatumik iluoorfiginninngitsumik iliuuseqarneq, persuttaaneq imaluunniit atorfeqartitaanermut tunngasunik annertuumik atorneqarluineq. Naliliineq unaavoq atorfeqartitaasup atorfimmini pisussaaffini kommunip sullitaanik innimiillioffiginninnermigut annertooujussuarmik unioqutissimagai.

Kommunip naliliinera unaavoq suliame illua'tungiusup isumaanik tusarniaalluni allakkat 31. august 2021-meersut aamma aalajangiineq 9. september 2021-meersoq [A-p] aalajangiinermit pissusiviusutigut, uppenarsaasersuinikkut inatsiseqartitsinikkullu tunngavigisaanik paasisaqarnissaanut tamakkiisumik periarfissiisuusut.

Allakkani 4. april 2022-meersuni Ombudsmandip allagaani 4. marts 2022-meersuni 2022-324-0001-8-mik normoqartuni immikkoortoq 2 innersuussutigineqarpoq, tassa-nilu Ombudsmandi ilaatigut imatut allappoq:

“Tamatumunnga atatillugu oqaatigaara peersitsinermut pissutaasut kommunip suli-sunut mappersagaani taaneqartut tulleriarlugit allatorneqarsimagaluartut pisut ataasiakkaarlugit pissusiviusutullu tunngaviusut ataasiakkaarlugit naliliisoqartar-tussaasoq.

Aamma oqaatigaara kommunip oqaaseqaammi 14. marts 2022-meersumi immik-koortumi 3-mi oqaatigigaa pisoq annertuumik unioqqutitsinertut isigineqartoq. Tu-nuliaqutaasulli annertuumik kusanaatsumillu unioqqutitsinertut sooq isigineqar-nerat kommunip erseqqissumik allaaserisimangikkaa takusinnaavara.

Kommuni tamanna tunngavigalugu qinnuigeqqippara taanna pillugu nassuiaateqaq-qullugu.”

### **Kommunip akissutaa**

Kommunip akissutaani immikkoortumi 3-mi nassuiaammi 14. marts 2022-meersumi 3 pillugu oqaatigineqartuni oqaaseqatigiinnit kingullernit erserpoq kommunimi meeqqat inuusuttullu pillugit sulianik suliarinnittup meeqqanik inuusuttunillu illersuineramik suliassaqartup tamatuma paarlatterluinnaanik meeqqanik inuusuttunillu taakkuninnga innimiilliorfiginninnera kommunip atorfeqartitaanermut tunngasunik annertuumik u-nioqqutitsinertut isigigaa.

Meeqqat inuusuttullu sanngiitsut kommunip isumassuinermi suliassamik tiguisima-nera pissutigalugu najugaqarfinni inissinneqarsimasut tassani tapersersuinerup ilaatut kommunimi taannaasumi immikkoortortaqarfimmi atorfeqartitaasumit innimiilliorfigi-neqassanngillat, immikkoortortaqarfiummi taassuma suliassarimmagu meeqqat inuu-suttullu inissinneqartut sulinermi pitsaasumik illersorneqarsinnaasumillu pissusilersor-figissallugit, inissinneqartut taakkua 18-it inorlugit sinnerlugilluunniit ikioqarnerat apeqqutaatinnagu, aamma innarliinerit inuusuttumut inuusuttunulluunniit arlalinnut atatillugu pinerat apeqqutaatinnagu.

[A-p] meeqqanut inissinneqartunut pineqartunut suliatigut pitsaasumik illersorneqarsinnaasumillu pissusilersornissamik piunasaqaammik (dekorum) eqqortitsisinaannginnera, kommunimili meeqqanut ilaqtariinnullu ingerlatsivimmi atorfeqartitaanermi misilinneqarfimmi nalaani taakkuninga kinguaassiuutinut tunngasutigut malersuermigut taakkuninga innarliisimanagera kommunip atorfeqartitaanermut tunngasunik kusanaatsumik annertuumillu unioqqutitsinertut isigaa." (Ombudsmandeqarfimmi nutsigaavoq)